





John Carter Brown  
Library  
Brown University







all  
LR  
23/32



EXCELLENT  
ET LIBRE DISCOVERS,  
sur l'Estat present de la France.

Avec la Copie DES LETTRES patentes  
D V R O Y, depuis qu'il s'est re-  
tiré de Paris.

Ensemble;


La Copie de deux lettres du  
Duc de Guise.

Par vn docte personnage, bien versé aux  
affaires d'Estat de la France.

(Hurault)



M. D. LXXXVIII.





3

EXCELLENT ET LIBRE  
DISCOVRS, SVR L'ESTAT  
present de la France.



N dit qu'il y a du plaisir à regarder du bört bouillonner les ondes, & à contépler de dessus la terre, comment l'orage & les vens se iouent de la mer, le le croy, & cela veut dire seulement, qu'il vaut mieux voir le danger de loing, que d'y estre. Mais si du haut d'une coste i'aperceuois vn nauire où i'eusse part, où i'eusse mes amis enfermez, en hasard de se perdre, & sans remede, emporté contre les rocs, par les courants & par la tourmente: que i'aurois de regret de me rencontrer à ce spectacle. Si la France ne m'estoit rien, sachant exactement son estat, cōme ie le scay, il ne me cousteroit gueres d'en discourir, quand on m'en apporteroit des nouvelles, elles me seroyent indifferentes, ie les receurois sans passion, bien aise au cōtraire d'estre hors de ses tumultes, d'ouir parler de ses remuemēs, avec aussi peu d'emotion & de crainte, cōme si on me contoit ceux qui aduindrent à Rome, sous Tybere où Neron. Je ne le puis estant François, ie ne le puis, voyant la seule barque de mon esperance, le vaisseau où i'ay tout ce que i'ay de plus cher, & qui lui mesmes m'est plus cher que moy-mesme, le voyant courir à son naufrage, voyant ma patrie, ma premiere mere, que tant de diuerfes maladies reduisent à l'extremité: haletant à peine son dernier soupir. Mais il n'y a ordre, avec les cris vne partie de la douleur s'en va, & les paroles, que la tristesse nous

arrache du cœur, font plus violètes, que celles que la ioye en tire. Si quelquefois aux afflictions nous souspirons des mots extraordinaires, tesmoins de nostre douleur, on les escoute plus vo'ontiers, que s'ils partoient d'un nonchalant esprit, alenti par ses continuels cōtenteimens, qui n'enfante rien aussi, qui ne soit vulgaire. Ceux cy seront de mesmes recommandables seulement pour la matiere qu'ils traitent, non pour l'ordre ou la disposition. Les autres seruent leur patrie de leurs corps & de leurs moyens. Ils font bien, puis qu'ils le peuuent: moy, ie plains seulement la mienne, ie luy donne mes seules larmes, n'ayant rien que cela de reste, qui luy puisse servir: ie loue ceux la, qu'ils ne me blasment point: ie feray comme eux quand ie le pourray, & eux comme moy quand ils seront reduits à ceci.

Mon Dicæ, Estant oisif en ceste Prouince, où d'autres occalions m'auoyent amené, i'ouys premieremēt dire que le Roy auoit esté chassé de Paris, par le Duc de Guyse. Comme toutes choses croissent par la reputation, ce fut là le premier bruit. Chascun aporte ses passions, pour commentaires des nouuelles qu'on luy conte: ie ne scay, si touché de ce vice commun, ie glosay incontinent sur ce raport: mais il me souuient que deslors ie dis à quelques vns qui m'e parlerēt, que ie ne croyois pas que la chose fust aduenue si cruement, estimāt bien l'un capable de ceste peur, mais non l'autre du tout de ceste hardiesse. En mesme temps, ou vn peu apres, on m'a apporté icy deux diuers ouurages, l'un est: vne declaration du Roy, sur ce qui est aduenu à Paris le douziesme May contre luy-mesme: mais cela si froid, si timide, que rien plus, comme

me d'un homme qui se plaint & n'ose nommer  
celuy qui l'a battu, comme d'un homme qui a peur  
que son ennemi soit encor en cholere, & ne se  
vueille contenter du mal qu'il luy a desia faict. Il  
n'ose dire qu'il ait esté contraint des'en fuir, ny  
qu'on l'ait chassé, n'ose appeller cela iniure, à pei-  
ne declareroit il qu'il en fera punition: ne cōman-  
de plus à son peuple, mais le prie. Et au bout du  
conte, ce qui est le plus ignominieux, mande que  
l'on face des supplications aux eglises, afin que  
ceste querelle se puisse bien tost appaiser, comme  
s'il auoit peur que Monsieur de Guyse fust offensé,  
de ce qu'il ne s'estoit pas laissé prendre dans le  
Louure, mais s'en estoit fuy. L'autre tout au re-  
bours, sont deux lettres du Duc de Guyse, l'une au  
Roy, l'autre publique, toutes deux lettres de sol-  
dat, braues, audacieuses, où il se loue galemment  
de ce qu'il a faict, dit, que ce iour là Dieu luy mit  
entre les mains le moyen d'un signalé seruice, le  
recite avec peu de paroles & hardies, sans aucune  
demonstration de crainte, ny de penser auoir failli.  
Et finalement cōclud par vne resolute menace, que  
maugré tout le mōde, il maintiendra le parti Ca-  
tholique, & chassera d'aupres du Roy, ceux qui fa-  
uorisent les heretiques, designant le Duc d'Esper-  
non. Mon Dicæe, cela m'a donné enuie de vous les  
enuoyer, vous estes curieux de semblables cho-  
ses. Et quant & quant l'indignation a tiré de moy  
ce discours de l'Estat de la France telle qu'elle  
est aujourd'huy, lequel vous seruira pour iuger  
mieux de ces deux escrits. Publiez-le si vous le  
trouuez bon, en taisant vostre nom & le mien  
car nous sommes appelez ailleurs: si non, gardez  
le en vostre estude.



La France est diuisee en trois partis. Le Duc de Guyse & ses parens de ce costé là comme les Ducs de Mayenne, d'Aumale, d'Elbeuf, de Mercure, freres ou cousins germains tiennent à mon iugement, celui qui semble le plus grád, & c'est celui qu'avec tous leurs partisans ils nomment la Saincte Ligue. Le Roy tient le second le plus legitime, mais le plus foible. Le Roy de Nauarre, & aucuns des Princes du sang Catholiques, Messieurs de Monmorenci premier officier de la Couróne, de Turaine. de Chastillon, & plusieurs autres Seigneurs, tant de la Religion que Catholiques, le troisieme, qui se peut dire le plus iuste, & certes encores le plus seur. I'appelle le premier, le plus grád soit par ce qu'il y a apparence qu'il soit deriué & comme vn membre de la coniuration generale de tous les Princes Catholiques de la Chrestienté, vnis & cōfederez enséble sous l'autorité du Pape: pour faire la guerre à ceux qui font profession de la religiō: soit par ce que ceste bande est nouuelle, & les nouuelletez en France, pour vn temps, surpassent tout, dequoy seruira d'argumét, l'apparat que auoyét aux premiers troubles ceux de la Religion en ce mesme Royaume, duquel ils auoyent occupé toutes les bonnes villes, vne ou deux seulement exceptées, & cependant ou bout d'vn an il ne leur en resta pas vne: soit finalement par ce qu'il s'est basti entre les Catholiques, qui y sont en beaucoup plus grand nombre que ceux de la religion, lesquels combien qu'ils ne soyent pas tous entierement & en tout & par tout de la Ligue, s'accordent presque tous neantmoins en ce point, qu'ils veulent la conseruation de leur Religion, & en  
cela



cela font demonstration de fauoriser ceux qui en entreprennent la deffence: ce qui fait que ce premier parti semble à la verité le plus grand pour cet heure, encor qu'il ne le soit pas à la verité, ou qu'il ne puisse gueres durer tel.

J'ai dit que celui du Roy estoit le plus legitime, nul n'oseroit debatre cela, tandis que suyuant ses seuls mouuemens, il a commandé à son peuple, il a esté seul obeï, & le feroit encores s'il vouloit, mais il faut que ce vouloir là luy prenne de bonne heure, car s'il tarde plus gueres & qu'il face conoistre qu'il est permis à tout le monde en son Royaume, non seulement de lui desobeïr, mais de s'attaquer à lui sans danger, iamais il ne recouvrera son autorité. Dieu en a mis les moyés en son seul courage. J'ai dit aussi que son parti estoit le plus foible. Il est vrai, il ne semble pas tel, il l'est, plusieurs raisons font cela. Lui premierement qui y commande, s'est gouuerné de telle sorte, qu'il fait conoistre que des trois chefs de ces trois partis, il est celui qui a le plus de foiblesse, qui a le plus de crainte, qui ose le moins entreprendre, & sur qui au contraire on entreprend le plus seurement, & le plus aisement. Il s'est dis-je tellement conduit, qu'il n'a plus rien qui retienne les esprits de ses suieets en son obeïssance, que l'ancien respect, qu'ils portent à leurs Rois, & l'ordre de leur royaume mal aisé à changer: moyens à la verité trespuissans en vn estat paisible, mais qu'une guerre ciuile de quatre ans seulement, peut aussi facilement ruiner, comme elle a fait autrestois à Rome en moins de temps, & comme elle a fait par tout ailleurs, ou elle s'est trouuée. Car elle ne s'engendre que par le mespris & le desdain du Prince, contraires au

respect & à la maieſté. Iugez là deſſus ce que pourra faire vne de trente, comme la noſtre. Secondement il eſt le Soleil couchant de ſon Royaume, & ſi foible encor en ſon coucher, qu'en ſa preſence il voit diſputer, & par eſcrit & par armes, de celui qui ſe leuera apres luy. Or deſpuis qu'un Roy ſouffre cela, il eſt perdu. C'eſtoit vn crime capital ſous les Cæſars Romains, de deuifer de ce qui aduiendroit apres la mort de l'Empereur, tant s'en faut qu'ils oſaſſent nommer quel ſeroit à leur aduis le ſuccèſſeur. Tyberé en ſcauroit bien que dire, lequel apres vne foibleſſe qui luy vint, eſtant malade dans le liſt en ſon extrefme vieilleſſe, fut eſtouffé par Caligula ſon heritier, prince ieune & floriffant, de peur que le vieillard eſtant reuenu de paſmoifon, ne le fiſt mourir, ſeulement pour auoir eſté ſalué Empereur, durant qu'on le tenoit pour mort: tant de ſoing auoyent ils de conſeruer leur puissance entiere iuſques au tombeau. Les Othomans ne veulent iamais que leurs propres enfans approchènt d'eux, ne pouuans meſmes ſouffrir leur eſperance. Et s'il faut trouuer vn exemple domeſtique de nos Rois. On conte que le grand François ayeul de ceſtuy-ci, eſtant caduc & malade en ſon chateau de Fontainebleau, où il eſtoit vne fois au commencement du mois de May de la meſme année qu'il mourut, la maladie luy accreut tellement, qu'on le tint ou pour mort, ou pour ne deuoir plus gueres viure. Soudain toute la cour, courut trouuer le Dauphin Henry, qui pour la meſme ialousie de la ſucceſſion, n'oſoit s'approcher de ſon pere, il y auoit fix ou ſept ans, de ſorte qu'à peine demeurait il vn ſeul homme de marque autour du Roy,

tout

9  
tout le monde estant allé adoré ce nouveau soleil.  
Pendant le Roy retourné en conualescence,  
pour ce coup, & sa maladie estant vn peu allégée,  
voici le iour de l'Ascension qui suruiét, iour qu'on  
celebre fort solennellemēt en Frâce. Le viel Prin-  
ce se leue, se pare, sort de sa chambre, le visage &  
les cheueux fardez contre la maladie & la vieil-  
lesse, s'habille des habillemēs d'vne gaillarde ieun-  
nesse, & en cest estat se trouue à la procession, &  
luy mesme porta le daix sous lequel repoisoit le  
Corpus Domini. Adioustant à son retour de là, ces  
mots, le leur feray encores peur vne fois deuant  
que mourir. Il fut vray, la chanse se tourna: car  
aussi tost que la nouuelle fut espandue de la san-  
té du Roy, tous les courtisans s'en reuindrēt dou-  
cement l'vn apres l'autre, bien estonnez & bien  
en peine, & le Dauphin à son tour demeura aussi  
seul que son pere auoit esté: cela c'estoit estre Roy,  
cela c'estoit se faire craindre. Combien y a il en-  
cor de pays au monde, où il suffit pour mourir  
d'enquerir quels pourroyent pretendre à la cou-  
ronne apres la mort du Prince, ou le Prince ne  
desire rien tant que de laisser cela en doute? Helas!  
il n'en est pas ainsi de nostre Roy: sa foiblesse à per-  
mis à tout le monde, non seulement de disputer  
de sa succession en sa presence, mais à quelques  
vns de le vouloir contraindre encor d'y pouruoir,  
& de faire son testamēt, comme s'il ne restoit plus  
que cela qu'il ne mourust. Sa foiblesse & la liber-  
té qu'il y a de l'offencer ont faiēt qu'un François  
peut dire aussi hardiment au iourd'huy, ie ne suis  
point du parti du Roy, cōme feroit vn Espagnol:  
au lieu qu'il y a trente ans, que c'eust esté vn blas-  
pheme, vn parricide. Sa foiblesse finalement est si



deshonoree, que i'ay veu me trouuant en pais estrangeur deuant vn grād Prince alié de la couronne Françoisse, qu'en parlant de nostre estat, vn de là, qui en discouroit, dit ces mots. Qu'il ne faloit conter le Roy que pour vn O en chiffre, lequel de soi ne peut rien, mais adiousté à quelque parti, le fait valoir d'auantage. Je l'ai veu & en rougis de creuecœur, pour la honte de la nation, combien que les diuisiōs de nostre Royaume, qui nous contraignent à des remedes extraordinaires, m'eussent conduit là pour vn autre effect que pour son seruice particulier, & que ce langage ne fust pour del'auantageux à ce que i'estois venu faire. Tiercement il ne se peut pas asseurer mesmes d'aucun de ceux qu'il estime de son parti. Ceux la perdent le cœur voyans que lui mesme l'a perdu, ceux la n'osent pas se affermir aupres de lui, voyans que lui mesme brāsse, n'osent s'attacher à bō escient à ceux qui lui font la guerre, voyant que lui mesme l'endure & a peine s'en ose plaindre. De ceste façon, tout son Conseil, toutes ses Villes, tous ses suietts sont partiaux. Et croi certes que de tant qu'il y en a qui approchent de sa personne, il n'en voit pas vn, excepté vn ou deux de ses creatures, en qui il se puisse asseurement fier, qui n'ait point de dessein particulier autre que le sien, qui n'ait part avec les vns ou les autres de ses ennemis. Car depuis qu'un Roy fait conoistre qu'il craint quel qu'un dans son Royaume, qu'il y a quelqu'un qui peut estre plus grād que lui, il n'a plus de maiesté, il n'est plus rien, tout le monde court à cestuy la. Si nous ne pouuons estre libres, à tout le moins nous ne voulons auoir qu'un maistre. Si ce maistre la a vn autre maistre par dessus luy, incontinent



nent nous laissons le premier pour courir au dernier: c'est le naturel de l'homme.

Quant au parti du Roy de Nauarre, qu'il ne soit le plus iuste, les commencemens de ces guerres en font foy, Il se deffend, la deffence est iuste & naturelle: il se deffend encor de telle sorte, que oubliant toutes occasions de se douloir, il a tousiours fait conscience de trauailler le Roy, (bien qu'au milieu de la guerre,) le voyant ailleurs empesché contre ceux de la ligue: non obstant qu'il sceut pour certain que toutes ces brouilleries que ils auoyent entr'eux retomberoyent toutes sur lui: Et non seulement cela encor, mais toutes les fois, qu'il l'a peu, il lui a offert sa personne & ses moyés pour lui faire recouuer son autorité contre les autres: A la charge de se soubmettre puis apres à telles conditions de paix, qu'il plairoit à sa Maieité lui dōner. Il l'a offert, & depuis ces derniers remuemens, encor bien que mil & mille occasions passées en toute ceste guerre luy seruent de preuve, qu'il ne se doit fier qu'en Dieu & en son espée. Je l'appelle encor le plus seur à bonnes raisons: sa personne premierement y aide beaucoup: ses ennemis à tout le moins luy ont fait ce bien là, de luy apprédre à estre Capitaine. Certes il l'est, comparable aux plus grands qui furent iamais, & si ce est à ses despens, çà esté encor plus au leur qu'il a fait son apprentissage. Ses partizans sont plus fermes ne regardans qu'à luy leul, retenus par le deuoir de la conscience, qui les vnit ensemble, soit pour la religiō, soit pour se sentir engagez en vne cause iuste. Son parti plus esprouué, deormais il ne peut craindre deffors qu'il n'ait desia essayez, les ennemis n'y peuuent plus rien entreprendre

de nouveau: Et si les deux autres auoyent esté aussi viuement attaquez par ce troisieme, comme ce troisieme par les deux autres, ils seroyent plus esbranlez que n'est cestuy-ci. Il a dauantage le droit acquis de la naturelle succession du Royaume, qui ne luy est nullement debatue par aucun particulier. Et quand bien toutè la France seroit d'accord de luy oster la couronne, quand elle luy escherroit, pour cela ne le seroit elle pas, à qui on la deueroit bailler en sa place. Or ce luy est vn grand aduantage de n'auoir point de certain Antagoniste. Ces esperances indubitables luy acquierent force seruiteurs, en retiennent beaucoup d'autres, & pendant cela, les esprits de plusieurs, qui ne veulent point voir changer l'ancienne forme de leur republique, scachans bien que cela ne se peut faire sans violence, sont bien aysez de s'arrester sur luy: qui y entrant par la porte ordinaire, n'a que faire de bresche.

Voyla quel est l'ordre, qui se trouue auourd'huy aux desordres du Royaume de France. Ce sont là les principales parties qui y sont desia reiglees & formees. Outre celles là il y en a d'autres, qui n'ont point de parti formé, mais qui se tiennent à l'vn de ces trois, autant que la commodité de leurs affaires particulieres le porte, qui viennent à la trauerse, & qui ont tous des desseins à eux seuls, s'accordans aux autres quant aux commencemens, mais non quant à la fin. Ceux-cy sont la Royne mere du Roy, le Roy d'Espagne, les Ducs de Lorraine & de Sauoye. Quant à eux, pour aider aux diuisions de nostre Royaume, pour deposseder le Roy de Nauarre & les Princes du sang, ils se trouuent tous bien d'accord, mais pour le partage, non.

non. Chascun le voudroit tout entier pour foy, ou à tout le moins la plus grande partie.

Il y a encor les Princes Catholiques de la maison de Bourbon, qui sont demeurez avec le Roy, qui sont bien tousiours de son parti, d'autant que la Religion, qui seule en separe le Roy de Nauarre, ne les en separe point, mais qui neantmoins n'en seroit iamais iusques là, qu'ils consentēt que l'on auance ou la maison de Lorraine ou celle de Guyse deuāt la leur, & qui en ce cas là porteront tousiours celuy du Roy de Nauarre leur aîné, comme le parti de leur maison. Ceux la tiennent vn grand rang en France. Car si le Roy de Nauarre n'y estoit point, la succession de la couronne tomberoit sur l'vn d'eux. Ce qui est encore vn fastecheux destourbier aux deslains du Duc de Guyse.

Avec toutes ces confuses & neantmoins distinguées diuisions, ausquelles comme j'ay dit, il semble que nos malheurs ont desia donné quelque forme & quelque reigle, chascun de tous ces partizans a son intention & ses procedures à part.

Le Duc de Guyse avec ceux qui vrayemēt sont de la Ligue ne recognoissent que luy en Frâce, a pour son intention & son but principal, de s'emparer de l'Estat, ou du tout, ou en partie: conseil hereditaire que le feu Cardinal de Lorraine son oncle enta en leur maison. Ce prince, seul autheur de nos querelles, auoit vn pere & vn oncle deux fort habilles hommes. Comme la diuision commença premierement du temps du Roy Charles dernier, entre les Catholiques & ceux de la religion: Et qu'ils virent que le feu Prince de Condé, qui en estoit, embrassa ce dernier parti: Eux qui auoyent donné le motif des troubles, se ietterent de



de l'autre, & deſſa certes le feu Duc de Guyſe s'eſtoit fait chef de part de ſon coſté, nourriſſant d'as ſon ame, par les deſſains du Cardinal ſon frere, vne ſecrette intétion d'vſurper pour luy, ou pour les ſiens c'eſte couronne. A quoy, le Roy & ſes freres eſtás tous petits, il voyoit le chemin luy eſtre ouuert principalement par la guerre ciuille. Il mourut laiſſant cetuy-ci quaſi enfant ſoubs la tutelle de ſon frere le Cardinal, duquel auec le laiſt il ſucça auſſi toſt les ſemences de c'eſte ambition domeſtique, qui furent ſi bien receues par ce ieune Aiglat, qu'en peu de temps on conut, que ce qui eſtoit de plus petit en luy, eſtoit plus gros que les reins de ſon pere. De vray il à beaucoup de parties nées en luy, propres pour vn grand deſſain: & quant à moy, i'ay touſiours penſé la naiſſance de cet homme là, fatale & comme vn indice certain, que Dieu vouloit changer quelque choſe en noſtre patrie. Luy ſeul eſt toute la Ligue, le reſte de ſa maiſon ne l'eſgale pas, & tous enſemble ne ſcauroyent fournir à la moindre partie de ce qu'il entreprend, fort diſſimulé, fort aduiſé, fort prudent, & plus que tous les autres de ſa faction: tout le monde voit cela par les effectſ: iel'ay veu par ſes eſcrits, & de ſa propre main, en vne affaire de tresgrande importance où le plus grand des ſiens apres luy, ſans luy, alloit faire vne lourde faute. Or voyla ſon intention & ſon but, voici ſa procedure, & comment il ſ'y gouuerne. Son mal à eſté, que venant au monde des affaires, il y auoit encor beaucoup d'enſans de Frâce, & de ſon aage quaſi, qui eſtoyent capables de pouuoir ſucceder les vns aux autres, d'eſtre mariez, & d'auoir des enſans, ce qui luy deuoit faire perdre courage. mais pour  
cela



cela, comme il commença à sentir son cœur, il ne s'estonne point: ains deguisant pour vn temps son dessein, il se contente de s'encren & de s'establir cependant dans le parti catholique, suiuant les enseignemens de sa maison. La fortune luy aida. D'ailleurs: il à beaucoup de vertu: quelques effects luy succedent. De sorte qu'avec le nom & la memoire de son pere, il se trouua incontinent par les guerres ciuiles (que le Cardinal son oncle r'allumoit tousiours par quelque moyen) le premier en la faction Catholique: se rendant principalement agreable aux villes, qui depuis les massacres estoient demeurees fort seditieuses & turbulentes, & en crainte d'un Prince de la religion: les citoyens desquels il careffoit par beaucoup de priuauté, de douceur, de façons populaires: (premieres & plus certaines marques d'un esprit qui aspire à la Tyrannie.) Le feu Roy Charles mourut sans enfans, cetuy-ci est marié, mais n'en a point: Plus il voit que la couronne manque d'heritiers de droite ligne, & que ceux de la collateralle y sont appelez, plus il s'en approche, & desia donne des tesmoignages qu'il y demande part. On oit des bruits sourds, qu'il estoit de la vraye tige de Charlemagne, ceux de Vallois de celle de Capet, lequel auoit vsurpé la couronne de France, sur ceux de sa maison. De sorte qu'il y auoit apparence, qu'à peyne attendroit il la mort du Roy à present regnant, & de son frere, restez des enfans de France, pour debatre leur succession contre les collateraux, mais que mesme il anticiperoit. Or n'auoit il rien si ennemi que la paix. Car n'estant appuyé q sur le parti des Catholiques factieux & sur les villes seditieuses, il perdoit son

credit là dedans, si on ne reueilloit la diuision contre ceux de la religion. Comme c'est vne chose certaine, que tout ainsi qu'une guerre civile nourrist diuers partis en vn estat, aussi vne longue paix les ruine tous, hors-mis celuy du Roy: tellement que son seul remede estoit tousiours de brouiller & nous reietter aux armes ciuilles, & puis entreprendre selon l'occasion. De faict dès l'an 1578. il fait vne ligue, comme ceste derniere, toutesfois le Roy ayant encor son autorité entiere, Monsieur son frere viuant, qui retenoit vne grande partie des esprits de France à luy, & par consequent en estoit d'autant à cestuy-ci: Elle fut incontinent estouffée, & en fut on quitte pour vne petite legiere guerre contre les Huguenots, laquelle peu apres on appaisa: la France eut repos deux ou trois ans, pendant lesquels il n'est pas croyable combien cest esprit turbulent, ambitieux, & courageux, par consequent, parist neantmoins de choses, se laissa raualler & gourmander en diuerses sortes, pour ne se faire point soupçonner de ce deffain, lequel durant la paix & l'autorité absolue du Roy, il desguisoit si habilement, que mesmes il en estoit mesprisé de beaucoup de gés, qui ne cognoissoyent pas les dernieres raisons de ceste opiniastre patience, marque d'un long & profond deffain. En fin Monsieur frere du Roy, qui estoit vn grand empeschement pour luy, vient à mourir. Cestuy-là luy vouloit mal d'ailleurs, d'autant qu'ayant des desfains sur l'estat de Flandres, luy qui deslors auoit vne particuliere intelligence avec le Roy d'Espagne, y faisoit de fort mauuais offices pour ce regard. De sorte que s'il eust vescu, i'ay ouy dire à plusieurs, que le Duc de Gnyse l'eut eu sur les bras.

A tout

A tout le moins luy estoit il malaisé d'entreprendre rien en France pendant sa vie. C'este mort (ou par hasard, ou par dessein) vient bien à propos pour luy. Je dis par dessein, d'autât que le proces & les confessions de Salcede, ont tenu beaucoup de gens en suspens sur cela. Soudain que Monsieur fut enterré, n'y ayant plus que le Roy debout, il luy semble qu'il s'offre vne belle occasion de venir à chef de son dessein commencé par ses Pere & Oncle, depuis 30. ans, & avec tant de peine acheminé par luy. Les vns croient qu'en mesme temps, il auoit des entreprises contre la vie du Roy, les autres, qu'il s'estoit fondé seulement sur des vaines esperances, & sur des pronostications, que l'on luy auoit enuoyé de tous costez, qui asseuroyét qu'il deuoit mourir bien tost. Tant y a qu'il iugea qu'il ne falloit pas que l'estat fust paisible lors de la mort du Prince, sachât bien qu'en France vn Roy ne meurt point, & que soudain vn autre prend sa place, qui à son aduenement romproit tous les desseins que l'on voudroit lors seulement commencer contre luy. Au contraire qu'il eust la main armee contre l'heritier des auparavant mesme la mort du Roy, & armee du nom & de l'auctorité du dernier Roy. Suiuant doncques ces preceptes paternels, & ses moyens domestiques, il commença à troubler derechef le royaume l'an 1585. premierement contre le Roy, d'autât que voyât que par persuasions il ne l'eust sceu amener à la guerre cõtre le Roy de Nauarre, il falloit qu'il l'y contraignist par force: il prend son pretexte sur ce que le Roy n'a point d'enfans, que la couronne est menacee de tomber entre les mains des heretiques. Ce qui met & luy & tous



les Catholiques de Frâce en allarme, voyāt mesme mēt que les chefs de ceux de la religiō , marquant le Roy de Nauarre, sont fauorisez, & ont des intelligēces secretttes avec les principaux & plus approchez du Roy: ce qu'il disoit pour le Duc d'Espernon nouuellement reuenu de Guyēne, où il auoit veu le Roy de Nauarre. Finalement se seruant fort à propos de la crainte qu'il dōnoit à son Roy, ayant corrompu tout son Conseil, & tous ceux qui estoient aupres de luy, il fait declarer la guerre au Roy de Nauarre & à ceux de la religion, & c'est celle qui dure encores aujourd'hui. Au train de laquelle ie pèse qu'il ne cherche que l'occsiō d'entreprendre. Le faict de Paris le monstre bien. Car il ne luy reste plus rien que cela, ce luy semble. Or les armes estans ainsi ouuertes contre le Roy de Nauarre, par l'aduis mesmes, consentement & auctorité du Roy: encor celane luy suffit il pas. Elles sont iournalieres. Ce Prince est braue, a beaucoup de vertu, beaucoup de moyens, beaucoup d'amis. Contre luy on ne peut pour le present guerres gaigner que des coups. Pour sa personne elle est en leureté, si on ne l'assassine, ou qu'on ne l'empoisonne, ce que Dieu destourne. Pour ses villes, douze Royaume de France ne suffiroient pas à les prédre toutes. Et quand bien apres auoir tout perdu, il ne luy resteroit rien lors qu'il sera appelé au Royaume, si Dieu le veut, que son espee, c'est encores assez. Combien de Roys ont esté tirez & de la prison & des monasteres pour estre sacrez? Nous en auons veu de nostre temps. Charles 7. fut couronné, banni dans les montagnes d'Auuergne. Louys 12. estoit quasi encor prisonnier en la grosse tour de Bourges, quand il fut proclamé Roy.



Roy. Il n'est pas croyable par les apparences humaines, que le Roy de Nauarre soit iamais si bas que cela. Et cela encores n'est ce pas assez. C'est vn merueilleux point, qu'un droit legitime à la succession. Ces cōsiderations partissent la ceruelle ambitieuse de ce Duc. Il voit que non seulement il faut qu'il rende la place de la couronne vuide, mais que luy mesme se face capable d'y entrer & de l'vsurper. L'un consiste en la ruine du Roy de Nauarre principalement : l'autre en l'accroissement de ses moyens & de sa creance, laquelle n'augmentera gueres s'il se contente de commander les armées sous l'auctorité du Roy, & de faire luy mesme la guerre à ceux de la Religion. Mille choses outre cela peuvent arriuer en vne telle entreprise qui defauoriseroyent du tout ses affaires, & cōme i'ai dit, il n'a pas beaucoup à gagner contre des gens qui se scauēt bien deffendre. Il se desfioit bien d'ailleurs, qu'ayant en cette guerre embarqué le Roy par force, on ne lui fourniroit pas les moïens, pour ce faire, qu'à regret aussi. Cependant si luy mesme commandant aux armes, ne faisoit des effectz dignes de tant d'esperance, & de tant de vanteries, qu'il auoit faites au commencement de sa ligue, il se ruinoit. Ces choses considerees, il se contente d'enuoyer son frere en Guyenne contre le Roy de Nauarre, & luy cependant s'attache au Roy mesme, avec lequel, par voyes obliques premierement, il espere de profiter plus, & d'y perdre moins. Son frere le Duc de Mayenne estant reuenu de Guyenne où il n'auoit rien fait, qu'accroistre la reputation du Roy de Nauarre & de mōsieur de Turayne son Lieutenant general, à qui il auoit eu principalement affaire : les

voicy tous deux ouuertemēt avec tout le teste de leurs parens & de leurs partisans, qui se prennent au Roy, sans toutesfois se despartir nullement de leur general pretexte, de faire la guerre aux heretiques, sur quoy la saincteté de leurs armes estoit fondee, & par lequel ils retournoyent tousiours le party Catholique de leur costé. Or de s'ataquer du premier coup à luy, encor y a il de la honte: ils ne peuuent sans aparence. Nul d'eux n'est Prince du sang, nul n'est si grand officier de la couronne que la reformation du Roy & du Royaume luy puisse estre bien seante. Sans cela leur pretexte general leur est du tout inutile cōtre luy. Le Roy n'est pas Catholique, il est bigot. Il ne hait pas les Huguenots, les Huguenots luy sont poison. Il pēse pecher, s'il parle à quelqu'un qui soit de ce nombre: il se confesse le iour mesme, il en a plus faict mourir que le Duc de Guyse n'en a veu: il leur a faict plus de mal que le Duc de Guyse ne leur en desire, & avec iuste occasion ils se plaignent plus de luy que de nul de ceux de la Ligue: les chefs de laquelle ont tousiours traicté les particuliers avec beaucoup de faueur & de courtoisie, louange qui ne leur peut estre desniee. Quel remede donc? Soudain que le Duc de Mayenne est reuenue de Guyenne, il publie vn escrit cōtre le Marechal de Matignon, Lieutenant du Roy en Guyenne, qui par le Roy luy auoit esté baillé pour compaignō en sa charge, lequel il accuse de trahison & d'intelligence avec les Heretiques, & avec le Roy de Nauarre, ce qu'il dit estre cause, que lon n'ait peu faire grand' chose en ce voyage, l'accuse si couuertement qu'il y mesle le Roy, duquel il se plaint qu'il luy a retranché l'argent, les viures, les munitions,

tions, & en somme luy a osté tout moyen de rien  
 faire, iusques à dire que c'estoit le meilleur amy  
 que les heretiques peussent auoir. La dessus le  
 Duc de Guyse de son costé crie, que ce qui retient  
 le Roy & le rend si nonchalât à cette guerre, c'est  
 le Duc d'Espernon, qui fauorise le Roy de Nauarre  
 son ennemi, pour la hayne qu'il luy porte, n'osant  
 frapper le maistre il frappe le chien, il dit que  
 c'est cestuy-la, qui est en France tout le suport des  
 heretiques, cõtre luy il anime tout le monde, Au-  
 dacieusemēt proteste de ne souffrir, qu'il ait nulle  
 part, nulle ville, nul gouuernement en France, &  
 encores que les propres gardes du Roy soyent du  
 tout hors de soupçon d'estre heretiques, neant-  
 moins par ce que ce Seigneur les commandoit, ils  
 les faict charger & desfaire par deux ou trois fois  
 en Picardie. Et sur ce pretexte il se saisit, tant en ce  
 gouuernement là qu'ailleurs, de toutes les villes  
 qu'il peut. Le Roy y veut pouruoir, veut retenir  
 ses villes en son obeissance. Pour cet effect, il se  
 sert des forces qu'il a aupres de soy, qui estoient,  
 cõme i'ay dit, ses gardes, & les regimens desquels  
 le Duc d'Espernon est Coronel. Lors voyci la que-  
 relle declaree contre le Roy mesme, & les choses  
 en sont allees si auant, que Boulongne est assiegee  
 par le Duc d'Aumale, Paris saisi par le Duc de  
 Guyse, qui en a chassé le Roy, tué, pris & deualisé  
 ses gardes, comme luy mesme s'en glorifie. A son  
 conte, quiconque a des villes, ou des gouuerne-  
 mens, qu'il ne veut pas tenir à sa deuotion, cetuy  
 la est heretique: Quiconque le veut empescher  
 d'estre Roy, cestuy-la est heretique. Voyla de  
 nouueaux articles de foy. On dit que depuis le  
 Duc d'Espernon a remis ses gouuernemens entre



les mains du Roy, & entre autres celuy de Normandie, duquel monsieur de Monpensier a esté pourueu. Je ne scay si cela aussi ne le fera point deuenir heretique, chose vn peu estrange toutesfois. Ainsi pour conclure ce propos: L'intention du Duc de Guyse est, de se faire Roy, s'il peut: sa procedure & ses moiens c'est la guerre ciuile & la diuision des François Catholiques contre ceux de la Religion, par laquelle il se rend chef des premiers ou il a plus de créace, ni que le Roy mesme, ni qu'aucun Prince du sang Catholique. Et à cela il ne faut point qu'ils se mescontent. Ce qu'il espere de ses desseins, le voici, de deux choses l'vne: Ou il se fortifiera tellement du viuant du Roy & mettra ses affaires en tel estat, qu'apres sa mort il ruïnera le Roy de Nauarre & l'empeschera de venir à l'Estat, Ou non. S'il ne l'en peut garder, à tout le moins le contraindra il de capituler avec lui, qu'il sera tousiours protecteur du parti Catholique, & non sans exemple: s'il le ruine vne fois, & avec lui tous ceux de sa maison, (cela s'ensuit, de l'vn despend l'autre.) Ou il possedera seul le Royaume, ou il le partagera avec ses partisans, la meilleure & la plus grand' part demeurant toutesfois pour luy. A ce festin il conuie le Roy d'Espagne, le Pape, les Potétats d'Italie, tous les princes Catholiques voisins, à qui la grandeur du Royaume est aussi preiudiciable, la prosperité du Roy & les esperances du Roy de Nauarre aussi à craindre, comme la ruine de l'vn & de l'autre, leur est vtile. Or le pis que ie voi en tout ce dessein, est, qu'il ne peut nullement compatir avec la longue vie du Roy. C'est à lui à y prédre garde: & ie croi que s'il eust encores demeuré gueres d'as Paris c'estoit fait.



faict. Quoi que ce soit, ie croi que c'est ce qui met aujourdhuy, l'un le plus en peine & l'autre en crainte.

Qui se resouuiendra à cette heure que celui qui est Roy en Frâce, est celui mesme, qui gaignoit les batailles à 17. & à 18. ans, qui ne se trouua iamais en nul lieu que victorieux, la vertu & la reputatiõ duquel, dès le commencement de sa ieunesse, lui acquirent des couronnes estrangeres, & des couronnes sur les plus belliqueuses nations du monde? sera bien estonné, quand on lui dira que la seule foiblesse, la seule desfiance de sa force, qui a par l'impression d'autrui saisi cette ame, autrefois si genereuse, est la verge, de laquelle Dieu soitte aujourdhui nostre Roiaume? Il faut dire de ce Prince, que si son naturel fust tóbé en vn bon siecle, s'il eust eu des seruiteurs dignes de lui, qui eussét aimé sa grâdeur, si dès son bas aage on ne lui eust point faict prendre les affaires avec peine, & les plaisirs avec plaisir, ce qui faict hair l'un & aimer l'autre: si depuis on n'eust point trauersé son estat, ni son esprit: Dieu lui auoit donné de grandes parties, pour faire de grandes choses. Mais la passion de sa mere, qui desiroit l'aduancer, pour s'en seruit à l'édroit de son autre fils, le mit au travail, lors qu'il ne deuoit auoir que le ieu à la teste: le fit souler de l'honneur, auant qu'il en eust faim: le desgousta de l'âbitiõ, auant qu'il en eust enuie. Apres cela certes, s'il est loisible de remarquer quelque defect en lui, il a eu cetui-la, d'estre vn peu subiect à aimer son repos & son aise. Ce qui est volontiers le plus ordinaire vice, nõ pas des Princes seulemēt, mais des hommes. Au reste, venât au Royaume, il le trouua plein de libertez, que les longues guerres

ciuiles aportent, plein de partialitez, & de desob-  
 beissances, il trouua que tous les grâds seigneurs  
 de son estat auoyent tous chascun vn dessein par-  
 ticulier, au lieu qu'ils ne deuoyent auoir que le  
 general de son seruice. & à cela luy mesme aida  
 bien encores par sa patience, ayant ce mal, que s'il  
 ne trouuoit point de resistance, s'il n'estoit point  
 trauersé, s'il estoit en paix, il commandoit fort ab-  
 soluëment & avec beaucoup de maiesté, mais s'il  
 y trouuoit tant soit peu de difficulté, il preferoit  
 tousiours vn remede doux & craintif, à vn hardi  
 & feuer. A quoy aussi lesprit d'un de ses princi-  
 paux conseillers d'affaires, & qui l'a tousiours le  
 plus gouuerné, a bien aydé à l'acoustumer. C'a  
 esté le premier Roy, avec qui les gouuerneurs des  
 places ont capitulé, ont demandé de l'argent pour  
 en sortir, ie ne dis pas seulement de celles que la  
 ialousie des guerres ciuiles auoit rendues partia-  
 les, mais de celles mesmes qui auoyent tousiours  
 demeuré de son costé. C'a esté le premier Roy,  
 lequel on a peu hardimét & sans crainte offenser.  
 Car quant à moi, ce qu'un autre nommeroit cle-  
 mence & douceur en vn Roy, & ce qu'on loueroit  
 particulierement en cetuici, dece qu'il ne s'est  
 jamais gueres resenti des iniures que plusieurs  
 luy ont faites, voire mesme aucuns qu'il auoit en  
 sa puissance, ie voudrois nommer cela, quelque-  
 fois, quand il y a de l'exces, vne espee de non-  
 chalance, qui aporte du preiudice à la Maiesté, &  
 qui si elle n'est pas à blâmer, à tout le moins n'est  
 elle pas à louer à vn Prince. Neantmoins il faut  
 confesser, que quand ces miserables guerres recô-  
 mencerét, Dieu luy auoit mis de bons mouuemés  
 au cœur, & prenoit vn chemin de reformer entie-  
 rement

rement son Royaume & de soulager son peuple. Et quant'il n'y auroit que ce mal, que ceux de la ligue ont faict en France, d'auoir interrompu ses bonnes intentions, ils ont chargé vn merueilleux faix de malediction sur leur teste. Or pour venir à l'estat auquel il se trouue maintenant & à ses desseins, certes il les a treslegitimes. Car ils ne tendēt qu'à conseruer sa vie, & l'autorité que Dieu lui a donnee: mais pour les conduire, il a pris vne tresmauuaise procedure, cruelle à son peuple, dure à son Royaume, & dāgereuse pour lui mesme, comme l'effect le monstre assez. Ce grand Prince connoist aussi bien le but du Duc de Guyse, comme nul autre. aussi à il raison, puis que c'est à luy qu'il s'adresse principalement, mais mal conseillé il a suivi iusques ici vn bizarre chemin pour y resister. De vrai il est excusable en quelque sorte, n'ayant autour de lui vn seul de qui le conseil ne soit pre-occupé ou de desir ou de crainte, & n'i aiant quasi pour lui, que lui mesme. Comme donc le Duc de Guyse eut pris les armes, sous le nom de la sainte ligue, nom desia assez connu en France, on lui proposa quant & quāt vne maxime tresfausse, laquelle neantmoins on lui persuada pour vraie, ascauoir qu'il n'i auoit que deux partis en son Royaume, les Huguenots & les Catholiques: que s'il ne cōmandoit à l'vn de ceux la, il demeureroit sans parti, & comme on dit, entre deux selles le cul à terre. Que le plus foible estoit celui des Huguenots, qu'il falloit donc par consequent qu'il embrassast le Catholique, & en ce faissant qu'il attirast à soi toute la creance que desia ceux de Guyse y auoient gaignee, ce qui estoit leur ruine & sa conseruation. Que pour ce faire, il falloit qu'il se mōtrast encor



plus passionné que personne, & plus cruel contre les heretiques, & qu'il leur fist à bon escient la guerre, surpassant tout le monde à leur vouloir mal: Que par ce seul moien ramenant à luy tout le parti Catholique, & s'en rendât le chef, il pourroit aisement y ruiner ceux de Guyse, qu'il craignoit & haïssoit, & tout d'une main se defferoit aussi par la guerre des Huguenots & de leurs chefs, à qui il ne vouloit point de bien. Voila le conseil qu'on lui bailla & qu'au grád malheur de son Royaume & de luy mesmes il a creu iusques icy. Dieu veuille qu'il y pése à cette heure, les effectz duquel ont esté: qu'au lieu d'estre deuenu, comme on lui persuadoit, chef du parti Catholique, il s'est rendu tant seulement ministre des passions du Duc de Guyse: desorte que soudain que l'autre branloit contre lui, il croyoit, que pour diminuer son credit & ses moyés, il falloit qu'il fist bien l'empesché contre les Huguenots, & la dessus à belles commissions, à beaux edits, à belles armées, rigoureux contre des hommes qui le craignent & le respectent, & qui ne lui font point de mal, & gracieux contre ceux qui le gourmandent à sa porte. Ainsi tout aussi tost qu'il receuoit quelque frasque par ceux de la Ligue, soudain qu'ils se mutinoient contre lui, qu'ils lui auoyét pris quelque ville, aussi tost le Roy de Nauarre se pouuoit asseurer qu'il s'en prendroit à lui, & qu'il lui enuoiéroit quant & quant vne armée. Pauvre Prince aueüglé, qui pensoit que ces gens là, qui l'eussent voulu voir mort, ne se fondoient que sur vn pre-texte, & que cela leur manquât il tireroit d'eux par imagination, ce q̄ par force il n'osoit essayer. Maudits soyez vous, qui lui donniez ce malheureux conseil



cōseil! Auez vous point de honte traistres Cōseil-  
liers? Vn Roy doit il souffrir des partis en son estat?  
Lui en faut-il vn autre que le sien? N'est-ce pas vn  
beau parti que d'estre Roy? Si vous dites que desia  
ces deux partis y estoient sans remede, he malheu-  
reux qui les y auoit mis que vousqui, les y nourrit  
encores? La guerre ciuile n'est elle pas la mere de  
ces partis? ostez-la, vous les verrez fuir. Qu'un Roy  
se tienne dedans sa force, & qu'il dise en Roy, Je  
veux la paix, vous verrez que le plus hardi de tous  
ces partisans n'y oseroit contredire. S'il faut faire  
la guerre, que ce soit donc contre celui qui l'em-  
peschera, & bien tost cestui-la sera vaincu. Or  
neantmoins suiuant cette maxime, on lui fit accroi-  
re qu'il n'i auoit moyen de se garentir, si lui-mes-  
me n'entreprenoit le pretexte de ceux de la ligue,  
& qu'il falloit que plus animeusement encores  
qu'eux il s'ataquast en apparence à ceux de la Re-  
ligion: Que les Catholiques estoyent desia vnis a-  
uec le Duc de Guyse cōtre les autres: que l'unique  
moyen de les desfunir, estoit de se mettre en sa pla-  
ce, & fulminer contre les Huguenots. Voila sa  
creance & son conseil. Cependant avec cette per-  
suasion la crainte le vint encore saisir là dessus:  
Crainte principalement fondee sur la iuste desfi-  
ance de ceux qu'il auoit mesmes à l'étour de luy. tel-  
lement que des qu'il vit la ligue armee, les portes  
de Paris à peine estoient elles assez seures pour  
luy, lui-mesme les alloit visiter, & au lieu que de  
son seul regard il pouuoit enuoyer cent pieds  
sous terre, tous les auteurs de cette mutinerie,  
dès qu'il en ouit parler, il s'estonne: il enuoye quāt  
& quant sa mere vers eux, pour les prier de s'ap-  
paiser, de l'excuser si en tēps de paix il n'a pas tenu

Si grand conte d'eux qu'il deuoit: que desormais il  
 les contentera: qu'ils demandent seulement & que  
 tout leur sera accordé. Somme il s'humilie quasi  
 deuant ses subiects pour les empescher de se muti-  
 ner contre lui, au lieu de faire demonstration qu'il  
 auoit & la volonté & le moien de punir leur re-  
 belliō. Il auoit totesfois tousiours l'esprit esloigné  
 de la guerre, connoissant prudemment, que c'estoit  
 la diminution de son auctorité, & s'il la craignoit  
 contre la ligue, il ne la desiroit pas contre ceux  
 de la Religion. Mais à la fin vaincu par sa mere, qui  
 auoit d'autres desseins que lui, & quasi par tous les  
 siens, il s'accorde finalement avec le Duc de Guyse,  
 consentant par force à la guerre contre le Roy de  
 Nauarre, auquel vn mois au parauant, il auoit avec  
 30. lettres de sa propre main, tesmoigné le iuge-  
 ment qu'il faisoit des intētions de ceux de la ligue.  
 Voila quel a esté le conseil du Roy, iusques à cet  
 heure. Or qu'il n'eust bié desiré, que le Roy de Na-  
 uarre eust esté assez fort pour contraindre les au-  
 tres & lui mesme encor à vouloir la paix, il n'i a  
 point de doute: mais que de son mouuement il l'eut  
 proposee, il n'eust osé iamais, & s'il l'eust fait, il  
 eut pensé deuoir estre quant & quant estouffé par  
 tous les mutins de la ligue. Son intention donc est  
 de viure, de regner & d'estre obeï, tant de ceux de  
 la Religiō, que de ceux de la ligue. Cela est tresiuste  
 & raisonnable, & le feroit s'il vouloit, mais avec  
 ces pernicieuses maximes, puis que lui mesme  
 reuoque sa puissance en doute, puis qu'il n'ose faire  
 le Roy, il ne faut pas qu'il trouue estrange si les  
 autres entreprennēt de le cōtrefaire. Dieu vueille  
 qu'à la fin il lui prenne enuie d'estre à bon escient  
 ce qu'il est, le maistre & le plus grand Seigneur de  
 son

son Royaume, cela ne se peut, s'il n'est Roy: & il ne le fera iamais s'il ne refout à vouloir le bien & le repos de son peuple.

Quant au Roy de Nauarre, sa condition & son intention sont du tout contraires ou differentes des deux dont ie viens de parler: tout ainsi qu'il s'accorde avec le dessein du Roy en ce qui est de la conseruation de sa vie & de son auctorité, sur quoi il ne peut ni ne voudroit entreprendre: aussi est il different d'avec lui en ce qui concerne la liberté des Eglises de France, pour laquelle il a les armes contre lui mesmes, entant qu'il la leur veut oster. mais il est entierement contraire & opposite aux entreprises du Duc de Guyse & de la ligue. Premièrement en ce que l'autre, à qui l'ambition donne les mesmes esperances sur la couronne de France, que le droit & la nature à cetui-ci, ne les peut auancer que par la guerre, que par la subuersion des loix, & changemant de l'Estat du Royaume. Car s'il n'i remuoit rié, s'il laissoit toutes choses en leur train accoustumé, il n'i à point de droit, il n'i pouuoit estre appelé. Cetuici au contraire ne les peut attendre, que par la paix, que par maintenir tout en ordre: son desir est ordinaire, que par cōseruer les loix, son tiltre est legitime: Et s'il vouloit prendre vn autre chemin avec de la violence ou de l'vsurpation: il trouueroit son riuai, autant plus fort & plus establi en ce moyen par dessus lui, comme en la vraie succession il a del'auantage. Cependant outre le droit du Royaume qui le regarde, il porte encor sur les espaules le faix de toutes les Eglises de la Chrestienté, il en porte les esperances sur la teste: sa perte en apparence humaine est leur ruine & leur oppression: Sa gran-



leur leur liberté. Et c'est ce qui augmente les forces de ses ennemis, & qui unit contre lui tous les Catholiques de l'Europe. Certes repensant à cette heure à cetuy-ci, comme ie faisois tantost à l'autre, il me semble que sous ces deux grands hommes Dieu veut exercer nostre estat, l'un ayant encores plus de forces de corps & d'esprit pour le conserver, que l'autre pour le ruiner. Mais l'autre ayant beaucoup plus de moiens pour le present selon la commodité qu'il a eu de s'estre rencontré dans le plus grand parti, & d'auoir peu se seruir mesmes de la puissance du Roy: cela me fera faire vne petite digression pour les comparer: & ils sont tels qu'ils meritent bien d'estre adioustez aux paralleles de Plutarque. Je me contrains tant que ie puis d'en iuger sans passion, encores que ie deusse pour ma Religion, mon parti, & infinies autres raisons, affectionner l'un dauantage: toutesfois ie ne sçay si cette affection là encor me desrobe point la liberté de mon iugement. Mais il me semble que cetuy-ci, quoi que l'autre soit grand, a beaucoup de parties esquelles il le surpasse. Je ne parle point de leurs desseins, ie ne reuoque point cela en doute: ie ne iuge pas seulement de ceux du Duc de Guyse, ie les condamne: car ie suis François: ie parle seulement des qualitez que Dieu a mises en eux, propres à l'un pour les auoir tels, à l'autre pour s'y opposer. Je diray donc, que cetuy-ci, a toute sa vie & des le commencement de sa jeunesse, combattu contre la mesme necessité, toutes ses affaires en ont esté pleines, iamais il n'a rien fait qu'à peine. L'autre au contraire a eu tout à souhait, à tousiours eu la commodité pour le premier. Item de ses entreprises: a tousiours plus

man-



manqué d'ouillage que d'œuvre, de forme que de  
matiere, de volonté que de moyen. Rien n'a assi-  
sté cetuy-ci, rien n'a résisté à l'autre. Cela me faict  
conclurre premieremēt, que s'estans par ces deux  
diuerſes voyes rencontrez auioird'huy tous deux  
esgalement grands, que l'un doit auoir plus apris,  
a plus esprouué, a plus de courage, plus de force.  
L'autre a plus d'ambitōi, plus d'esperance, cela né  
en luy par la grandeur de ses moyens, & par con-  
sequent plus d'entreprise, plus d'audace. Que  
l'un a moins d'apparence, moins de vanité, moins  
de lustre aussi & d'etclat en ses affaires. L'autre  
moins d'assurance, moins de solidité. Ce qui me  
faict penser, que quand cetuy-ci se trouuera parmi  
l'abondance, il s'en sçaura bien mieux seruir, que  
l'autre ne se deffendrait de la necessité, s'il y e-  
stoit iamais réduit. Je ne diray mot des guerres  
precedentes où, tousiours neantmoins le Duc de  
Guyse a eu à souhait les dons de fortune: & cetuy-  
ci au contraire a souuent essayé ce que peut la mi-  
serere, voire l'extresme. Je veux parler de celle cy  
de laquelle ie diray: que si i'auois veu ce grand  
entrepreneur attaqué deux ans durant, par huit  
armees Françoises enuoyees au rafraichissement  
l'une de l'autre, & conduites de rang par les meil-  
leurs Capitaines de France, entre lesquels ie con-  
re son frere le Duc de Mayenne, & qu'au partir de  
là non seulemēt il n'eust rien perdu, mais eust en-  
cores pris sept ou huit bonnes ville, & gaigné  
vne grande bataille, sans auoir entre les mains  
moyē quelconque pour le fondemēt de ses effects  
q son seul courage, cōme i'ay veu aduenir au Roy  
de Nauarre: ie penserois lors les pouuoir cōparer;  
mais iusques là, il n'y a pas de raison. On me dira

que le Duc de Guyse a beaucoup eu plus d'entreprises & de plus grâdes, & que tout ce que le Roy de Nauarre a peu faire, c'à esté de resister. Je l'aduoue. Il estoit bien aisé à l'un d'entreprendre, tous estās à sa faueur, malaisé à l'autre de resister, tous estans contre luy. Comme le labeur, aussi la gloire doit estre plus grâde. Ils ont neantmoins encorés beaucoup d'humeurs & semblables & differētes, mais rien de petit, rien de foible. Tous deux ont beaucoup de courage, il leur en est bon besoin, tous deux sont humains, affables, familiers, tous deux ont le corps adroit, patiens de labeur, agreables. Mais ils ont l'esprit fort dissemblable. L'un est tres-homme de bien, franc, ouuert, libre, bien souuent impatient, se resoluant neantmoins tres-bien sur le champ, & sur le peril, si attentif à ce qu'il voit de present deuant luy, & si actif au fer qu'il faut barre, qu'il regarde moins à ce qui est passé, moins à ce qui doit suivre, ne veut gueres conceuoir de desseins tirez de loin, contant de sa seule esperance, & les remettant tous là. L'autre est diuers & corrompu au possible, caché, retenu, fin, patient, voire mesme iusques à en estre blasme comme i'ay dit, dissimulé, conduisans ses proiects de longue haleine, car il faut que luy-mesme forge ses esperances, voyant de loin, n'entreprenant rien que ce qu'il s'asseure d'effectuer, mais ie ne sçay, peut estre, se trouuant à la pointe du danger, s'il seroit si acoustumé à s'y resoudre prôprement, ne l'ayant si souuent essayé. Tous deux, quoy que ce soit, sont deux grands hōmes & des plus grâds que la France porta iamais, & qui eussent faict des plus beaux effects, si vn grand Roy s'en fust voulu seruir, & que son siecle l'eust peu permettre.

Pous

Pour retourner donc à mon propos, comme j'ay dit, Quant au Roy de Nauarre, il n'a ni ne doit auoir aucuns desseins dans l'estat, son esperance luy en fournist assez, & d'ailleurs il est assez empesché à rompre ceux de ses ennemis: Il n'a autre but de ses armes que la paix, & le repos du Royaume: mais vne paix à laquelle neantmoins il ne cōsentira iamais, que les Eglises de France, & par ce degré s'il peut, les estrangeres, ne soyent en liberté. Il n'a que faire de debattre le droict qu'il a à la couronne, il n'est pas temps, & puis ce qui est certain, ne se doit reuoquer en doute, ni disputer, moins de se mettre en peine de la ruine de ceux de Guyse ou de Lorraine: Il n'affectionne leur mal, sinon autant, qu'eux celui du Royaume: auquel s'ils vouloyent estre vtiles, il les en reconnoist trescapables, comme particuliers. Leur degré ne va pas iusques au sien, cōme se seruant du nom de Roy. Ce nom là l'empesche de pēser au leur. Voila son seul dessein: s'il en a aucun, c'est de se defendre, & de telle sorte, qu'il contraigne ses ennemis de rendre la paix à la France, au Roy son auctorité, à luy & aux siens leur liberté. Qu'apres cela, que ceux de Guyse s'enrichissent, s'agrandissent tant qu'ils voudront, pourueu que ce ne soit point aux despens de l'un de ces trois, ne luy importe. La procedure & le chemin qu'il y tient n'est pas certaine, elle despēd de celle que tiennent les autres cōtre lui: s'ils le laissent en paix, il y demeure: s'ils viennent aux armes, il y court: s'ils les posent, aussi faict il: & c'est pourquoy quand tout le reste du Royaume seroit accordé, le Roy scait bien dās son ame qu'il y auroit peu, ou point du tout, de difficulté avec cetuy-ci, qui n'estant mené que de



la raison, y sera tousiours aisement ramené.

J'ai parlé des trois chefs principaux qui tiennent les trois partis de Frâce: il faut voir quels sont ceux qui viennent à la trauerse, quel but ils ont, & commét ils y visent, & quelles esperances ils ont de le toucher. Entre ceux là, la premiere est la Roine mere du Roy, laquelle pour son honneur & en apparence, se tient dās le parti de son fils, comme elle a tousiours faiēt, quand elle en auoit plusieurs de celui qui estoit le Roy: mais qui neantmoins ne hait rien tant que sa puissance absolue, elle s'en est mal trouuee: lors que la France estoit paisible, elle estoit cōtrainte de filer sa quenouille en sa maisō, son fils ne luy laissoit la charge, ni le maniement d'aucune chose. Pour recouurer son auctorité, il luy a fallu brouiller les cartes, ou s'entendre avec ceux qui les brouilloient: autrement elle estoit inutile: ce que son esprit certes nullement capable de petites choses ne peut iamais souffrir, & de ceste grande Princeesse de qui la race a commandé, ou commande auioird'huy aux meilleures parties de l'Europe, on peut dire comme d'Agrippine, Virilibus curis muliebria vitia exuisset, si cela desia n'estoit vn vice de femme. C'a tousiours esté sa coustume, d'opposer en France les vns aux autres, pour commander cependant en ces diuisions: Les grands aux grands, les Princes aux Princes, ses enfans mesme à ses enfans. Car elle scauoit biē nostre estat estre tel, que si ce n'est par vne voye extraordinaire, vne femme n'i a point de credit. Du temps du feu Roy Charles, cetui-ci estoit son protecteur, la puissance duquel elle acreut tāt qu'elle peut, afin de s'en seruir pour se rendre necessaire à l'autre: ce Roy s'en aperceut à la fin, mais trop tard.



tard. Depuis cetuy-ci estant parueniu à la couronne, en quoy certes elle l'obligea infiniment lors qu'il estoit en Pologne, estant bien certain que si elle n'i eust pourueu sagement, les remuemens eussent esté tels en France, que peut estre à son retour on luy eust empesché l'êtree. Son credit luy dura entier trois ou quatre ans, pendant que ce ieune Roy ne s'ôgeoit qu'aux plasirs de son aage, & aux delices de son nouuel estat. Mais depuis comme il vint à prendre l'affirmatiue, & à vouloir gouverner seul, elle fut contrainte d'auoir recours à feu Monsieur son dernier fils, qui pour quelque temps luy tint espaule & la rendit necessaire. Estant mort, elle a chosi d'autres remedes: Car quoy que ce soit, elle a tousiours desiré deux choses. L'une, d'obliger celuy qui pouuoit venir à la couronne, à fin de le retenir quand il y seroit: L'autre, de le faire si grand cependant, que celuy qui seroit maistre de l'Estat, fust contraint de se seruir d'elle, pour tenir l'autre en bride, employant ainsi doucement la puissance de tous les deux l'un contre l'autre, pour gouverner au milieu & estre recherchee: conseil qui pour son particulier estoit aussi plein de prudence, comme souuent de trouble, & d'incommodité pour le public. Or si apres la mort de feu Monsieur, elle eust trouué le Roy de Navarre capable de ces desseins, elle en eust fait son bouclier. Mais la religion & beaucoup d'autres raisons empeschant cela, elle a ietté ses yeux & ses vœux sur la maison de Lorraine, & sur les enfans de sa fille, à quoi encor a beaucoup aidé la haine que dès sa petite ieunesse elle a porté à ce Prince: estimant donc irreconciliable avec luy, elle le craint par

consequent, & est resoluë d'empescher en tout ce qu'elle pourra qu'il n'ait part en France: elle ne le peut sans renuerfer l'ordre du Royaume. Car apres ceste haine, succede cōme i'ay dict, l'amour qu'elle porte aux enfans du Duc de Lorraine, enfans de sa fille, ausquels elle a vne secrette inclination, ne cessant iour & nuict de reprocher au Roy, qu'il doit mieux aimer pour heritiers ses nepueus fils de sa soeur, qu'un estrāger de sa maison, ainsi nomme elle le Roy de Nauarre. Les filles d'Espaigne sont aussi enfans de sa fille, à qui de mesme elle seroit bien aise d'en faire part, & non point marrie cependant que l'estat de son fils soit troublé, afin qu'il aye recours à elle, & qu'il l'employe. Or de ceste façon elle s'accorde bien avec le Duc de Guyse pour le trauerser, pour remuer, pour donner des ouuertures à la confusion, & des moyens de changer l'orde de la succession de nostre Royaume: mais de desirer, qu'il s'agrādifse, tellement qu'il puisse ruiner le Roy mesmes & le deposseder, & luy mesme occuper apres tout l'Estat, il n'est pas vray semblable, ie ne croy pas qu'elle le desire aussi. Or sous ce dessein de la Royne mere, ie comprends celuy du Marquis du Pont son petit fils, fils de Mōsieur de Lorraine, lequel aussi n'a ni intelligence ni esperance en cest estat, sinon celle, qu'elle sa grand' mere, luy saict prendre.

Il y a apres le Roy d'Espaigne, qui du commencement de ces guerres voyant la Royne d'Angleterre nouer vne fort estroite alliance avec le Roy, voyant en mesme temps les deputez du pays bas à Paris luy offrir la souueraineté de leurs prouinces, s'aduisa de ietter trois ou quatre cents mil

esfus

escus entre les mains affamees de ceux de la Ligue, afin de troubler le royaume de France: s'assurant qu'il empescheroit le Roy par ce moyen d'entendre à la Flâdre. Ce qu'il craignoit sur toutes choses, comme, à la verité il n'i a qu'un seul Roy de France, pourueu qu'il soit paisible, qui puisse aisément oster ses prouinces à l'Espagnol. Voila ce qui luy embarqua, & par consequent precipita un peu les conseils du Duc de Guyse. Oultre cela il craint extremement à ceste heure, que le Roy de Nauarre ne paruienne à l'estat de France, c'est son naturel ennemi, il luy detient un Royaume, lequel il ne faut point douter que si les ongles croissent à l'autre, ne lui soit arraché un iour, en danger encor qu'on ne se contentera pas de cela. Il scait bien qu'estant vieil, les enfans ieunes, son estat diuisé & mal assésuré, peu de choses apres sa mort le troubleront. à plus forte raison un Roy de Nauarre, s'il estoit Roy de France. Ainsi il est bien aisé de s'accommoder avec ceux de Lorraine, de leur fournir des moyens pour remuer, afin d'estre cependant plus libre en ces guerres du Pais bas, & d'Angleterre, pour empeschier le Roy de France, pour ruiner celui de Nauarre: pour puis apres le Royaume estant en proye, comme luy est le plus puissant de tous, en rauir la plus grande part. Voila son intention, en ce qui concerne nostre estat: Mais qu'elle aille iusques là, que chargé de beaucoup d'autres despeses particulieres, il veuille encor espuiser ses tresors, pour faire le Duc de Guyse Roy, lui dis-je qui croit que s'il faut chager la façon de succeder, ses filles, niepces du Roy, en doibuent auoir la meilleure part, il n'i a point d'apparence: & ce que ie dis du Roy d'Espagne seruira pour le Duc de Sa-

uoye son gendre qui a moins de puissance beaucoup, & n'a desseins que ceux de son beau-pere. Ainsi ce sont là tous ceux qui font bien ou mal à la Frâce. Voila ses bonnes & ses mauuaises humeurs, voila les bons ou mauuais vents qui la tourmentent. Et de leurs discordes & passions aussi diuerses cōme eux, aussi differentes & contraires cōme ils le sont, despend son bon ou son malheur. Puissant empire l'honneur de l'Europe! à qui la suite de 1200. ans n'a sceu apporter que de l'acroiſſemēt, les voisins ennemis que de la gloire: il estoit bien raisonnable apres tant & tant de victoires, que tu finisses par tes mains propres, que tu succombasses sous tes propres efforts, le destin n'ayant point faict au monde de victorieux pour toy.

Mais pour laisser vn peu ce propos, qui me cōuie plustost à pleurer qu'à escrire, puis qu'il aduiēt que la diuision de la Religion sert de pretexte au changement de nostre Royaume, & par consequent à sa ruine, si Dieu le permet ainsi, ce mal estant quasi commun à tous les estats de l'Europe. Je m'eschapperay vn peu pour dire quelque chose des affaires generales de la Chrestienté, en ce qui concerne ces deux grands partis, l'vn tenant encor l'obeissance du Pape, l'autres'en estāt distraiēt. Je ne veux point traicter de cecy en theologien. Je scay bien que Dieu esprouue ordinairement les siens par les afflictions, comme c'est ce qui retient les hommes en leur deuoir, & ce qui leur faict auoir incontinent recours à celuy duquel ils ne se peuuent gueres souuenir, quand ils ont le col enflē de prosperité. Je scay bien que le Fils de Dieu prononce disertement ces mots, Mon  
Roya-



Royaume n'est point de ce monde, monstrant euidemment aux vrais Chrestiens, que ce n'est pas icy où il faut qu'ils cherchent leur aises, & que pour s'y trouuer affligez, il ne faut pas pour cela qu'ils entrent en desffiance de leur cause, comme si Dieu les auoit en detestation, & qu'il les voulust oster de dessus la face de la terre. Au lieu qu'au contraire ils voyét qu'aux Turcs, aux Payens, aux pauvres auenglez des superstitions du Pape, toutes choses neantmoins arriuent à souhait: ils conquierent les Royaumes: les prouinces leur fournissent des veines d'or, qui ne tarissent point, leurs armes par tout prosperent, leur heur leur fait trouuer des hommes qui pour leur seruice assassinent vn Prince leur ennemi, au milieu de ses gardes. En fin ils n'ont à peine desiré, que Dieu leur permet de voir la fin de leur desir: ayant au rebours imposé cette necessité à ses vrais seruiteurs, de charger sa croix sur leurs espauls, s'ils le veulent suiure, de passer par la porte estroite, & de nourrir à son exemple toute leur vie en douleur, en affliction en necessité. Suiuant ces reigles & ces marques, qui ne peuuent s'approprier qu'à ceux qui font profession de la vraye Religion reformee, il me suffiroit de cōclurre, que ceux là que Dieu afflige ainsi, sont ses vrais enfans, lesquels il veut affliger, & nō pas perdre: qu'il veut chastier, mais nō punir: qu'il traicte cōme ses fils qui ont failli contre ce qu'il à commandé, non comme des valets qui l'ont desrobé. Et ainsi que combien que par toute la Chrestienté aujourd'huy les plus grands Potentats du monde, se soyent liguez, vñs & bandez contre eux: c'est pour neant, Dieu ne laissera iamais perdre ce qui est à lui, ceux là sont à lui, il les

abaissera quelq̃ fois iusques à d'eux doits de l'eau:  
 mais lors il allongera son bras de deliurance pour  
 les retirer du goufre:& cela outre la verité indubi-  
 table de ceste promesse qu'il a faite aux siens, ie le  
 pourrois encor prouuer par la suite des choses  
 qui se sont passees en l'Eglise despuis la fondation  
 du monde. Mais comme i'ai dit, mon dessein n'est  
 pas à cette heure d'en disputer en theologien: il  
 me suffit de monstrier, que non seulement nous a-  
 uons ce grand apuy supernaturel de la puissance  
 de Dieu pour nous deffendre, bouclier impenetra-  
 ble, & contre lequel tous les traits du monde re-  
 bouchent la pointe en arriere: Mais encor que dās  
 le monde mesme & dans les moyens humains il  
 nous en a donné, sans comparaison, plus qu'à nos  
 ennemis: de sorte que si nous souffrons, s'ils nous  
 affligent, ce n'est que nostre faute, & pour ne nous  
 scauoir pas aider de la puissance qu'il nous a dō-  
 nee. Toute la Chrestienté qui est sous l'obeissance  
 du Pape, est auiourd'hui vnüe pour exterminer  
 ceux de la religiō. Qui sont ces mauuais la? iugeōs  
 de leur force, & si elle est telle que nous la deuons  
 craindre. C'est le Pape, c'est l'Empereur, c'est le  
 Roy d'Espaigne, ce sont quelques Potentats d'Ita-  
 lie, c'est en France le Duc de Guyle, & ceux de sa  
 maison, se seruans du Roy & du Royaume comme  
 ils veulēt, c'est en Suisse quelques Cātōs, en Alle-  
 maigne quelques Princes. I'ay tout nommē, & a-  
 uec les plus specieux noms que i'ay peu: y voila  
 des Papes, des Roys, des Empereurs, & force Prin-  
 ces. On dit que tous ces terreurs du mōde se sont  
 assemblez, avec ce seul dessein, de ruiner ceux qui  
 sont profession de la vraye Religion, par toute la  
 Chrestienté. Je le veux, Ainsi soit. plus d'ennemis,  
 plus

plus de gloire. Mais espluchons les de pres, nous trouuerons que tous ces gés là ont chascun quelque dessein particulier, qu'ils gardent pour eux, & que pour entretenir leur vnion tous ensemble, ils s'accordent seulement au general. Quels desseins? considerons les expressement. Celui du Pape est clair: Luther, Zuingle, Caluin, lui ont faict perdre les deux pars de son reuenu: le troisieme est en grand brâsse: on y trauaille, Il voudroit bien & recouurer ce qu'il a perdu s'il estoit possible, & asseurer ce qu'il tiét à l'aduenir. Le Royaume d'Angleterre tout entier s'est escoulé de ses mains: si le Roy d'Espaigne y pouuoit replanter la Religion Catholique: ce seroit autant de regaigné pour lui. La France ne lui a esté iamais gueres obeissante, l'Eglise Gallicane a eu tousiours ses priuileges à part, totesfois ce n'est rien encore, ce lui-semble, au pris de ce que ce seroit, si le Roy de Nauarre en est iamais Roy. Il craint qu'il ne passe les Alpes, il est de la race de Bourbō fatale pour rome, & puis il est desia irrité contre les Papes, pour son royaume de Nauarre, que desloyalement ils ont adiugé aux Roys de Castille. Apres il craint qu'un grand Prince, cōme cestui-la, n'apporte beaucoup de reformation en la religion, vn iour; ce qui ne se peut faire sans la diminution de l'auctorité du siege, & ce qu'il pourra aussi aisement neantmoins, comme Philippes le Bel & plusieurs autres Roys de Frâce aduersaires des vsurpations des Papes l'ont peu. Ainsi c'est son principal interest, que de retrancher l'esperâce de ce Prince. De son costé il faict ce qui est en lui: il tonne, il fulmine, il anathematise, il le declare heretique, rebelle, finalement incapable de la couronne de France, cōme si c'estoit à lui de



la donner ou à l'oster. Pour l'exécution de cette bulle, qui à la verité ne feroit toute seule grand effect contre les boulleuars de la Rochelle, s'il n'i a autre chose que cela : il arme toute la Chrestienté, iusques au Cardinal de Bourbon, à qui il enuoye vne espee beneiste de la race de celle de S. Paul : il promet de l'argent à ceux de Guise : il le promet il ne l'enuoye pas, n'ayant encores payé ce que lui couste le Papat, suiuant le stile de Rome. Somme, comme c'est à lui de faire, il fait miracles avec le baston de la croix, & voila sa tâche & son dessein, d'animer tout le monde contre les heretiques, entre lesquels il comprend la Royne d'Angleterre, & le Roy de Nauarre son principal ennemi à son aduis, desquels il espere la ruine par ceste Ligue vniuerselle. Autant ou plus a il à se plaindre de la haulte & basse Allemagne, comme de la France & de l'Angleterre : doncques il s'assure qu'après que le Roy d'Espaigne & ceux de Guyse auront chastié, c'est à dire vsuré la France & l'Angleterre, en chassant les heretiques, c'est à dire les vrais Princes & legitimes Seigneurs, apres qu'ils a ront dompté les pays bas, ils pourront ioindre sans contradiction leurs armes avec celles de l'Empereur, pour contraindre par amitié ou par force les Princes d'Allemagne Protestans, de rentrer sous le ioug de son obeissance : qu'après cela n'i ayant pas grande apparence que les Suisses veulent s'opiniastrer contre tant de forces, leurs Cantons estans desia diuisez, tous ensemble pourroyent facilement assister le Duc de Sauoye au recouurement de Genesue, & au sac de ceste ville qu'ils appellent la source & la fontaine des heretiques de la Chrestienté. C'est là où



là où il borne la fin de son desir, & de l'entreprise de ceste S. Ligue. Ce que j'ay veu escrit par lui mesme Pape Sixte, en vne lettre surprise au commencement de ces troubles en France, enuoyee d'Italie en Espagne. Et quant à cetuila, voila son pretexte, voila son intention fondee sur les haines qu'il porte generalement aux heretiques, mais principalemēt au Roy de Nauarre, à la Royne d'Angleterre, desquels il a receu desia, ou craint recepuoir plus de mal.

Le Roy d'Espagne a trois fins particulieres pour lui, pour lesquelles il desire cette ligue generale. La premiere, de venir à bout de la guerre contre les pays bas, tenus par ceux qu'il appelle heretiques, & contre la Royne d'Angleterre qui en est aussi. La seconde, le desir hereditaire qu'il a de iondre la France à ses Seigneuries: ce qu'il pense à ceste heure, pouuoir plus facilement faire, pour le droit qui lui en appartient à cause de sa femme fille de France, & des filles de luy & d'elle. Car quant à lui, il ne pense point que la loy Salique, l'honneur de nos Roys, soit faicte pour luy. Le dernier, la ruine du Roy de Nauarre, lequel à quelque pris que ce soit, il veut autant comme il pourra eslongner de la couronne, pour beaucoup de raisons qu'il a de crainde ce grand ennemi, que Dieu reserue à la ruine de sa maison vn iour. Pour l'vtilité de tous ces trois desseins, il est entré & a fort sollicité ceste ligue generale, laquelle lui fortifie son tiltre de guerre cōtre l'Angleterre, d'inimitié contre le Roy de Nauarre, lui donne moyen d'entreprendre par sous main cōtre l'estat de France, en fauorisant les affaires du Duc de Guyse son partisan, avec lequel sans cela il ne

pouuoit auoir d'intelligēce qui fut profitable: par son moyen il espere ruiner le Roy de Nauarre en Frāce, il espere de se seruir des haures de Picardie & Normandie, contre l'Angleterre & les pays bas: s'asseurant bien puis apres, que le Roy de Frāce mort, son legitime successeur depossédé, le royaume estant en proye, il pourra aisement lors faire la part à ceux de Lorraine, estant plus fort qu'eux: & de ceste façon on voit qu'il tourne à son profit particulier, & à son intention le pretexte general de ceste belle ligue, comme si elle n'estoit faicte que pour les affaires de sa maison.

L'Empereur voudroit bien que tous les autres Princes de la Chrestienté qui sont de la religion, fussent ruinez, afin que tout le corps de la ligue le vint desgaiger des Poteštāns qu'il a ses voisins: mais d'autant que la besoigne est encores longue, & que cependant il ne seroit pas bon pour lui de faire l'empesché, de peur de reueiller ces grands Princes plus puissāns que lui: il ne se mesle gueres auant en la meslee, non plus que les autres Princes d'Allemagne.

I'ay assez discouru du dessein du Duc de Guyse, qui est de se faire seul Roy en France, s'il est possible, ou de la meilleure partie au moins: dessein qui volontiers ne reçoit point de compagnon, & auquel on ne traueille gueres pour autrui. Ce que ie remarque seulement, pour monstrier, que pour s'aider des moyens d'Espaigne, en France, à l'aduācemēt de son entreprise, pour aider lui-mesme en recompēse à lui regaigner les pays bas, pour voir la Roynie d'Angleterre, à qui il veut mal de mort, & qu'il scait estre le seul support de son ennemi, ruinee, il aura tresbonne intelligēce avec le roy d'Elpai-

d'Espaigne: mais pour lui ceder entieremēt la couronne de France, pour la tenir de lui en hommage, s'il la peut vsurper, pour lui en laisser la plus grande part: ie croi que non. Cependant ces pretensiōs n'ayās fondement que sur la diuision de la religiō, il le faut reconnoistre pour vn des signalez piliers de la S. ligue.

Les Princees d'Italie n'ōt dessein aucun que leur conseruation, estans enfermez d'un costé du Pape, de l'autre des Venitiēs, du Roy d'Espaigne au troisiēsme, & puis estāts diuisez, & leurs estats si petits, qu'ils n'ont pas grand loisir de pēser a autre chose qu'à se maintenir: & pour cette raison seulement sont ils entrez en la ligue. Mais ils ne sont pas si bons Catholiques, qu'ils ne craignēt plus la grandeur de la maison d'Espaigne, que la diminution de leur religion. Ceux qui ont esté en leur pays scauent cela.

Le Duc de Sauoye est aussi compris en cette generale Vnion, tant que son beau pere viura, il aura les mesmes entreprises que luy: s'il meurt, cōme ie diray tātost, il en aura d'autres, qui ne cōpatiront pas du tout à celles de la ligue. De mesme le Duc de Lorraine, lors que chacun voudra recueillir le fruit de son labeur, & l'interest de sa despense, Sa conclusiō ne s'accordera pas avec les propositiōs du Duc de Guyse. Les Cātōns de Suisse ne sont pas à mon iugement entrez en cette ligue, à cause de l'alliance qu'ils ont avec nostre Roy, & le lien qui les vnit en leur pays. Toutesfois ie ne doubte pas que pour de l'argent ils ne fournissent des forces, non pas à la ligue en general, mais particulièrement au Duc de Guyse, encor en ont ils fait souvent difficulté.



Expressement i'ay voulu monstrier les desseins  
 d'un chacun de ces partizans de la Ligue, pour  
 prouuer ce que i'ai dit, que chascun d'eux en auoit  
 de particuliers, discordans entre eux, afin de mon-  
 strer par là, que quelque bonne intelligence qu'ils  
 ayent ensemble, il nous seroit fort aisé de l'auoir  
 meilleure. Tout d'une suite ie veux rechercher  
 quels sont leurs moyens & leurs forces, ausquel-  
 les encor ie m'assure, que ie trouueray tant de  
 manquemens au pris de ce qui est entre nos mains,  
 que nous aurons honte de nous laisser battre. Je  
 commenceray par les plus foibles. Je tiens l'Em-  
 pereur & les Princes d'Allemagne Catholiques  
 de ce nombre. Car combien que sans difficulté,  
 ils ayent beaucoup de puissance: neantmoins  
 leurs voisins Protestans ont tant de force comme  
 chascun scait, qui sont les Roy de Dannemarc,  
 Electeurs Palatin, de Saxe & de Brandebourg,  
 Landgraue de Hessen, & plusieurs autres grands  
 Princes & Seigneurs: que si ceux là veulent, les  
 autres n'oseroient auoir faict semblant d'entre-  
 prendre chose quelconque. I'ay dit des Cantons  
 de Suisse ce qui est de leur force, & comme elle  
 peut seruir à cette Ligue generale. Quant au  
 Princes d'Italie, le Duc de Sauoye, comme le plus  
 prochain de nous tous, & aussi le plus à craindre de  
 tous eux. Mais premiermēt hors de chez luy c'est  
 vn petit faict que de sa force: secondement il s'ar-  
 reste plus à des esperances certaines qu'à des in-  
 certaines. Son beaupere est vieil. à sa mort il espere  
 profiter, & croy qu'il iettera plustost l'œil sur les  
 estats de Milan & de Naples, si la succession d'Es-  
 paigne se partage comme il y a grande apparen-  
 ce, que les filles ambitieuses au possible, & desia  
 intro-



introduites par le Pere mesme aux manimés de ses affaires, & quasi en possession de ses Royaumes, à peine se pourront contenter d'estre mariees pour vne portion d'argent, & laisser tant de biens à leur petit frere, ieune, maladif, & à ce que l'on dict, hebeté: tellement que ce Duc aura là, à mon aduis, de la besoigne taillee, sans qu'il s'amuse à entreprendre rien de deça les monts qui l'enfermēt. Au partir de là, quand il le voudroit, il peut si peu, & il se trouue en pays si defauantageux, qu'estant arresté d'un costé par les Allemans, de l'autre par les Suisses, de l'autre par les François & par tout par les Alpes, les forces qu'il leueroit de son pays, qui ne scauroyēt estre que fort petites, ne peuvēt estre conduites en lieu où elles facent effect, qu'avec grand' perte & difficulté. Quant à son argent, pour faire bonne chere en sa maison, il en a assez: pour faire vne grande guerre, nō. Les autres Princes d'Italie, comme les Duc de Ferrare, de Mantoue, & de Florence, d'Vrbain, qui sont quasi les principaux, sont tous adioustez pour augmenter le cayer, & pour dire Voici force gens, pour autre chose non: s'il y auoit guerre en Italie mesmes, entre deux grands Princes, tels qu'estoyent Charles d'Espagne, & François de France, ils pourroyent à la verité beaucoup fauoriser les affaires de celuy qu'ils voudroyent assister. S'il faut dresser vne armee de mer cōtre le Turc, chascun d'eux equipera biē vne ou deux galeres, & voila tout: mais qu'ils puissent de beaucoup seruir en vne grande guerre, cōtre nous, ou en Frāce ou en Angleterre, ou en Allemagne, ou en Flandres, non. Et puis cōme j'ai remarqué, ils ne seront iamais si auant de la ligue, qu'ils ne craignent plus la grandeur d'Espagne,

que la diminution de Rome.

Le Duc de Parme, entât qu'il est Duc de Parme seulement, peut estre mis de ce nombre, entant qu'il commâde aux forces du roy d'Espaigne aux pays bas, certes il est grand Capitaine : sans doute il a acquis beaucoup de reputatiō, de creance, soit parmi les armées qu'il commande, soit parmi les pays où il faict la guerre, & creance hereditaire encores, la memoire du gouuernement de sa mere y estant tref-agreable. Mais aussi bien que le Duc de Sauoye, il seroit mal sage, s'il n'auoit des desseins à part, & s'il ne s'arrestoit plus à des esperances certaines qu'à des incertaines. Je croy quant à moy, qu'il ne se resout pas d'auoir trauaillé si lōg temps en Flandres pour autrui. Or il y a vn point là dessus: C'est que tât qu'il y fera la guerre, cōme Lieutenant du Roy d'Espaigne, il peut faire beaucoup de mal : mais s'il préd vne fois le chemin de s'en faire Seigneur luy-mesme, comme il le pourra aisement en ce qu'il tient, apres la mort du bō hōme, ne le pouuant que par douceur & par la volōté des peuples, il n'est plus à crandre, il faut qu'il se desmelle d'avec la ligue. Quant au Duc de Lorraine, c'est vn grand Seigneur, mais vn petit Prince: ostez luy de deuant les yeux les esperances, qu'on luy a faict prendre en France pour son fils, ce qui seul l'embarque en la ligue, il prendra quât & quât le parti de son repos sans chercher querelle. Il est fort sage: & croy que nos remuemens en France ne viennent point de luy. Totesfois à ceste heure en ceste cause generale cōtre nous, qu'il ne s'y employe, il n'y a point de doute: mais j'estime qu'il y a ceci de bon en cest endroit, c'est qu'empeschant la grādeur du Duc de Guyse son cousin,

comme

comme de necessité il est contraint de faire pour l'amour de son fils, il nous fait plus de bien qu'il ne scauroit autremét nous faire de mal : or il l'empesche à cause de la couronne, laquelle en fin s'accordant & s'entédant avec la Royné mere du Roy sa belle mere, il demandera plustost pour son fils que pour l'autre. Et ie tiens pour maxime trescertaine, que le Duc de Guyse nostre capital aduersaire en est desia si auant, qu'il faut qu'il soit ou Roy, ou ruiné: il n'a point de milieu pour luy entre ces deux extremes. Marius, Cinna, Pompee, Lepide, Antoine, font foy de cela. Despuis qu'une fois on a aspiré à la Tyrannie, Aut Cæsar aut nihil. Or quant à luy, j'ai parlé auparauant de ses moyès: ils sont certes assez grands en France, parce que le parti Catholique y est grād, dans lequel il a beaucoup de creance, & l'assurance qu'il a, que le Roy endurera toutes ses hardiesies, estāt sa principale force. De cetuy-là ie ne doute point, que comme son dessein particulier s'adresse sur nostre estat, aussi, que s'il auoit dās son cabinet les ducats des Indes, qu'il n'i fist bresche: & apres cela, bien du mal aux autres. Mais il est extremement pauvre & endebté (seconde marque d'un homme qui aspire volontiers à nouuelletez.) Apres cela il a trop de contredisāns à ses intentions, non seulement de ses ennemis, comme du Roy de Nauarre & des Princes du sang: mais de ses amis mesmes, comme des heritiers d'Espagne, de Lorraine, & de Sauoye, & de ceux de sa propre maison, qui pretendent autāt de droit à l'vsurpatiō de nostre couronne que luy, & ausquels, puis qu'il est contraint de s'en seruir, comme il est, il sera contraint aussi de faire part, de ce qu'il rauira, s'il peut rien raur: ce qui luy



apportera infinies ialoufies, tellement que toute la puissance de ce partifant là, ne peut aller à mon aduis, que iufques à la diffipation & defmembrement de nostre Royaume: encor faut il qu'il y foit aydé. Car de porter les armes, ou contre les Alle-mans, ou cōtre les Anglois, ce fera à peine, & pour le moins ce ne fera jamais qu'il n'ait fait entiere-ment fes affaires en France: ce qui est vne longue befongne. Et fur cela ie veux bien remarquer vne chose veritable, de nostre nation. C'est que nostre naturel est tel, que deffoubs vn Roy defia estably nous nous diuiferons bien, nous ferons des guerres ciuilles, des remuemens: mais s'il n'i en auoit point, s'il estoit queftion de pouruoir à la couronne, iamais nous n'en souffririons le defmembrement. & si vn Prince ne se trouue capable de l'empieter toute, il est malaisé qu'on lui permette de la diuifer, si ce n'estoit vn grand Prince voifin, cōme le Roy d'Espaigne, qui par force & par le voyfinage de fes pays cōferuast le quartier qu'il auroit enleué, encor lui seroit il tresdifficile. Finalement ie ne veux que deux tesmoignages, pour mōstrer que ce n'est pas si grand' chose de la puissance de cet homme. L'vn, de ce qu'au commencement de la ligue, lors de son grand feu, que lon pensoit que sur sa parolle toute la Frāce prendroit le halecret, iamais il ne se trouua accōpagné de mille cheuaux François, & quatre mille hommes de pied au plus: encor cela se dissipa en vn mois, bié qu'il eut prodigalemēt despendu tout l'argēt qu'il receut d'Espaigne & le sié, pour les amasser. L'autre que, depuis estant en la guerre, vne petite armee de Reiftres, composee de quatre mil cinq cēs cheuaux & de trois ou quatre mil Lansquenets, avec quelques Suiffes



Suiffes, passa en despit de lui par dedans son gouuernement, iusques dedans le cœur de la France: le battit & rebattit au passage autant de fois cômé elle le vit: combien qu'il eut appellé aupres de luy tous ses amis, tous ses partisans, toutes ses forces: combien qu'il eut outre cela la plus part de celles du Roy: combien qu'il se fut vn an deuant vanté, qu'il combattroit les Allemás iusques sur le bord du Rhin, & qu'il importast extremement à sa reputation de le faire. Or neantmoins c'est sans doute que si on permettoit à ce chef de part, de croistre, & que Dieu ne luy eust point mis de bride autour de luy, c'est le plus grand, le plus capable & le plus dangereux ennemi que puissent auoir les estats qui font profession de la religion:

Reste les deux plus mauuais: ascauoir, le Pape & le Roy d'Espaigne. Le premier est le plus criard, le plus mutin de tous, & le pl<sup>us</sup> foible neantmoins. C'est l'ordinaire, Acutū reddere qui possit ferrū, exors ipse secandi. De vray il ne sert que d'aiguiser les cousteaux: les Papes vne heure auparauant l'estre, ne scauent pas s'ils le feront. Deuant cela, ce sont la plus part du temps de petis Cardinaux Italiens: car la ialousie en recule les plus grands, qui durant le Cardinalat n'auoyent de dessein que de croquer quelque Annate, ou quelque Benefice. Ceux qui peuuent remuer du mesnage, volontiers ne sont pas appelez là: l'Italie s'en est mal trouuee. Au reste nul ne l'est qu'il ne luy couste bō: & ils sont tous si bon mesnagers, que quand ils meurent, ils ne laissent que le moins qu'ils peuuent au successeur: tellemēt que le nouveau Pape, les trois ou quatre premieres annees, a assez à faire, à payer ceux qui luy ont vëdu son siege: les autres à viure.

& c'est vn extraordinaire, quand ils passent huiſt ou dix ans: autrement on diſt quant & quant, *Exiit fermo inter fratres quòd discipulus iſte non moritur.* Car ils ſont fort vieux quand on les eſlit: de forte qu' auparauant qu'ils ayent moyen de nuire, ils ſont enterrez. Et de ceſtui-là, quand il n'i aura que luy, il ne nous faut craindre que des bulles & du plomb, qui ne fond mal qu'à ceux qui en ont peur. L'or du Roy d'Eſpaigne ſeroit bien plus à craindre, & l'aigardé le plus grand de tous & le premier mouuât, qui fait mouuoir rous les autres, pour le dernier. Mais auſſi de ſon coſté il a beaucoup d'incommoditez qui lui lient les mains: & de cetui-ci, par ce que toute l'Europe eſt remplie de ſon nom, il en faut dire quelque choſe de plus.

Ce Prince eſt fils de Charles le quint, ce grand brouillô du monde, qui y a târ remué de meſnage tant qu'il y a eſté, qui y fut plus heureux par ſes Lieutenans que par lui-meſme, qui eut pour amis ou pour ennemis à diuerſes fois tous les Princes de ſon temps, grand Prince neantmoins, vigilant, guerrier s'il en fut onc, & penible à la guerre, au reſte plein de courtoisie & d'humanité, & qui eſtoit certes digne du nom de Cæſar, digne de l'Empire. Ceſtuy-ci fut nourri des le berſeau aux affaires par ſon père: toutesſois il fut beaucoup plus heureux que luy: & ſon heur conſiſte en ce, que tant que ſon aage l'a peu annimer aux grâdes choſes, il n'a trouué aucun qui luy ayt fait de la trauerſe, ſon pere auoit en meſme faiſon le grand François de France, le grand Henry en Angleterre: Soliman en Leuant, & en Alemaigne des Princes qui exerçoient bien ſon eſprit: de ſorte que par tout, ou il ſe tournoit, il trouuoit chaudière à ſon pied.

Outre

Outre cela il trouua tous les pays qui luy estoyēt voisins aussi forts & aussi capables d'entreprendre sur luy, que luy sur eux. Voila ce qui rendit sa fortune diuerse. Au contraire, Philippe aujour-d'hui Roy d'Espaigne, a esté accōpaigné d'un heur qui ne s'est iamais interrompu. Mais il faut plostost attribuer cela, à ce qui s'est rencontré autour de lui, qu'à lui mesmes. La France de son temps a esté gouuernee par vne femme, & par des enfans, ou tellement trauaillée des guerre ciuilles, qu'elle auoit assez à faire chez'elle. L'Angleterre commandee aussi par vne femme, qui suiuant le naturel de son sexe, s'est sagement contentee, de maintenir ses subiects en paix, & se garder des entreprises de ses voisins, sans entreprendre sur eux: l'Allemagne par des Princes pacifiques, le Leuant par Selim, vn gros yurogne qui n'aimoit qu'à boire, & despuis par Amurat son fils à demi idiot, qui ne bouge de la mosquee, ainsi ne faut il pas dire, que par tout il a eu de l'heur, mais qu'ē nul lieu il n'a trouué personne qui lui put faire venir du malheur: & encor avec cela n'a il pas fait grande chose. La conqueste de Portugal & des Indes à esté plus facile qu'heureuse, il n'i auoit point de peine: la conqueste de la Terciere, & la victoire sur les François ne sera point trouuee si estrange quand on considerera, que c'estoit vne iuste armee d'Espaigne, cōtre vne troupe de vaisseaux ramassez en France. Quant aux batailles de Grauelines & de S. Quentin, c'estoyent encores des restes des victoires de son pere, c'estoyent les armees qui dès leur ieunesse auoyent couru la fortune du vieillard, il y auoit là peu du sien, la personne mesmes n'i estoit pas. En Italie rien n'a branlé, en Bourgoigne, au Royaume



de Naples, en Sicile rien: au contraire en Affrique il a perdu la Goulete, le seul labeur de Charles son pere, & tout ce qu'il auoit là. en Flâdres ses victoires n'i ont pas tant faict qu'il n'i ait encores plus à faire. Et la raison, par ce qu'il y a trouué de la resistance. Il est bien aisé à vn hōme de gagner quand personne ne ioue contre lui. A cette heure à cette heure qu'il a des ennemis dignes de ses forces, nous verrons ce qu'il fera en Angleterre avec tout son grād appareil: nous verrons s'il gardera encor cette tant renommee bonne fortune. Or cependāt l'estat où il se trouue à presēt, est tel. Premieremēt il est extreſmement vieil, & encores plus cassé. Il n'a que deux filles, & vn petit garçon, elle grâdes, ambitieuses desia, & fieres au possible: l'vne Duchesse de Sauoye, l'autre nourrie entre les bras de son Pere & dās les affaires de son estat, qu'elle gouuerne seulle: son fils est petit & mal sain, cōme i'ay dit, & voila des sources de diuisiō: car en Espagne les filles peuuēt succeder. Outre cela son estat est fort diuisé. Les pays bas, qui en estoyēt le meilleur morceau, sont bien esgarez pour luy. Ce qui en est du tout retranché, cōme les prouinces vnies avec la Royne d'Angleterre, il ne voit pas esperance de le pouuoir iamais recouurer. ce que tient le Prince de Parme soubs son auctorité, il ne s'assure guerres qu'il le vueille fidellement laisser apres sa mort à ses enfans: l'autre est vn braue Prince, grand Capitaine, aimé de ceux à qui il cōmande, estimé des autres cōme i'ai dit, qui a vsé de beaucoup de foy & de moderatiō enuers ses peuples, desia bien edifiez de la façon de laquelle sa mere les auoit gouuernez au parauāt luy, qui y a acquis beaucoup de creance & assez, pour pouuoir vn iour retenir ces  
apen-



apennage au lieu du Portugal que le Roy d'Espaigne à son aduis, luy a osté. & qui, quoy que ce soit se fachera q̄ ses labeurs soyēt vouez pour vne fille, ou pour vn petit garçon. Le Duché de Milá est voisin du Duc de Sauoye: cetuy là y pretendra droict à cause de sa femme, & suyuant son cōtraēt de mariage. Le Royaume de Naples & les villes d'Italie, suivront la fortune du Duché de Milá. Le Portugal ne luy est encores gueres asséuré: les Portugais impatientiens du cōmandement des Espaignols, d'autāt plus leurs ennemis qu'ils leur sont voisins, cōme c'est l'ordinaire des peuples. Les Indes tant Portugaises qu'Espaignolles, le seul nerf de cet estat, seront à celuy qui possedera ou l'Espaigne, ou le Portugal. Cela estant de cette façon, ce Prince a desormais plus de besoin de penser à la conseruation de sa maison & de ses seigneuries, qui indubitablement s'en vont diuisees apres sa mort, que non pas de troubler ses voisins. Il est riche à la verité: mais il luy faut employer vne infinie despence, n'ayant quasi pays, où il ne soit contraint de tenir vne grosse garnison. Or qu'il soit necessiteux, il le faict bien paroistre à ses troupes qu'il tient en Flandres, où il demeure aucunes fois vn an ou dixhuiēt mois sans leur bailler vn sol. Autant comme il est riche d'argent, aussi est-il pauvre d'hommes: il n'é peut recouurer que d'Allemaigne, d'Espaigne, d'Italie, ou de Bourgongne: & voyez sa foiblesse. Car quant aux Allemans, si nous estions tous vnis: nous l'empeschierions, ou d'en leuer, ou d'en passer pas vn. Quant aux Italiens & Espaignols, dont il ne peut fournir en grand nōbre: car ce ne sont pas pays populeux, comme chascun scait, il faut pour venir attaquier ou la France, ou les Pays bas, ou

l'Allemagne, qui sont les endroits où nous sommes, qui le conduise, ou par mer, ou par des lieux si malaisez, que si nous nous entédions tous bien, il en perdrait la moitié deuant que de s'en pouuoir seruir. Les Espaignols ne peuuent venir que par mer ou par le Pyrenée: les Italiens que par les Alpes, ou par l'Allemagne, chemins, si nous voulons, qui leur peuuent estre du tout fermez. Au reste, il n'i a rien si miserable que lui en sa propre terre, rié si aisé à battre. Et est certain, qu'on l'eut peu aisément ruiner par le Portugal, si on l'eust viuement attaqué par là, depuis que le Roy Dom Antonio en a esté deschassé. Voila en bref l'estat du plus grand de nos ennemis, qui à mon aduis, bien considéré, ne doit pas sembler si puissant comme on l'estime. Les effets avec cela & l'exemple le montrent: Veu que depuis trente ans qu'il traualle à reconquerir la Flandre, seul endroit ou il a tendu toute la puissance, il n'a pas profité de grand chose, & si il ne faut pas dire, que là il ait trouué vne résistance digne de lui: néanmoins il est assez clair, que sans le mauvais gouvernement de feu Monsieur, & la mort du feu Prince d'Orange assassiné malheureusement, tesmoignage de la foiblesse de cet ennemi, il estoit quasi au desespoir, & eust perdu tous ces pays sans remission, quelque chose qu'il eust peu faire.

Quand on aura ainsi considéré l'estat de nos ennemis piece à piece, on trouuera suivant le prouerbe Francois que, Tout ce qui reluit n'est pas or. Mais si apres on les regarde encor en gros, cela seruira bien à en faire le iugement que i'en fay. On les trouuera tous extremement diuisez de lieux, & de regions. La plus grand part & la plus forte est  
en

en Espagne & Italie: Il y a entre deux quatre cēt lieues de chemin par terre: l'autre en France, mais celle là est si peu de chose, que si les moyens d'Espagne d'Italie ne s'y ioignoiēt pour lui aider, elle seroit biē tost estouffee. On verra que chacun des partisans qui entrent en ceste Ligue generale, n'apportent que la moindre portion de leur desir au dessein general, tout le surplus au particulier. On trouuera que la pluspart d'eux tēd quasi à vne mesme chose: Le Roy d'Espagne, le Duc de Lorraine, de Sauoye, de Guyse, à la couronne de France. En quoy il ne se peut qu'il n'i ait des ialousies, & que le mesme qui les vnit ne les separe. On verra aussi, qu'ils ont des desseins cōtraires les vns aux autres, comme ceux que j'ay remarqué du Duc de Parme & de Sauoye. & en fin lon cōsiderera que les deux derniers qui sont comme colonnes de ceste ligue, le Roy d'Espagne & le Pape, l'un est extrememēt viel, & si malade, que ceste année mesme il s'est departi de toutes sortes d'affaires, iusques là, que beaucoup de gens tiennent qu'il est priué de sens par la vieillesse. L'autre, qui est le Pape, ne peut faire estat de ses moyens, sinon autant qu'il viura: or ne peut il gueres viure veu son aage, laissant vn successeur apres luy, qui s'amusera plustost à faire sa maison, qu'à ruiner celle d'autrui: dressera plustost de nouueaux desseins, qu'il ne poursuira ceux de son predecesseur. Voila doncques en gros & en menu toutes les forces de nos ennemis.

Or si à leurs moyens generaux nous opposons generalement les nostres, si nous assemblons ceux de la Roynie d'Angleterre, du Roy de Nauarre, du Roy de Dannemarc, des Princes d'Allemaigne, des Estats des Pays bas, des Cantons de Suyse, quelle



puissance trouuerons nous? Si nous nous seruons au contraire d'eux, de la commodité que nous auons de nous ioinde sans empeschement, la France, l'Angleterre, l'Allemagne haute & basse, & la Suyffe, s'entretouchâs quasi, n'aurôs nous pas plustost ruyné leurs desseins, qu'ils ne les aurôt commencez? nous dis-ie que nostre religion peut lier plus estroitement qu'eux, estant meilleure que la leur: nous qui n'auons nulle entreprise que de nous deffendre & de conseruer nos droicts: ce qui nous vnit: qui n'auons point de dessein particulier qui puisse engendrer de ialousie entre nous, qui estant contraire nous puisse diuiser? Il n'i a point de doute. Voyons la preuue de cela. Il y a trois ans que le Roy despaigne coupe toutes les forests d'Italie pour bastir des Carraques: achapte tous les Mores d'Afrique pour faire des forcats; met les Indes sans dessus dessous à force de fouiller pour trouuer toutes les mynes de l'or, comme s'il n'en vouloit plus apres: Il y a trois ans qu'il ne parle que d'ancres, que de cordages, que de voyles: qu'il menace l'Ocean, s'il ne recoit doucement ses vaisseaux: qu'il cōmande aux vents de les fauoriser, & tout pour dresser vne grande & Espaignolle, c'est à dire, superbe, armee de mer, l'ombre de laquelle toute seule face baisser non pas seulement les mas des nauires, mais la pointe de tous les clochers d'Angleterre. il est gros despuits ces trois ans d'une armee, & à la verité cōme ces grands ouurages ne s'enfantêt pas tout a vn coup, ni facilement, il met beaucoup de temps & de peine à en acoucher, & volontiers encor les choses sont elles plus petites à leur naissance que l'on ne pèse, elle naistra dôcques à la fin en Biscaye, elle sera seuree au Cōquet, & se trou-



trouuera vis à vis d'Angleterre assez forte & assez grande pour receuoir l'ordre de Cheualerie : Cela ne monstre il pas qu'en vn seul lieu, qu'en la seule Angleterre nous auons des moyens assez pour resister au plus dangereux de tous nos ennemis? Il y a trois ans qu'il l'a menacee, il ne luy a pas encor faict peur. hel quand est ce qu'il luy pourra faire mal? Il y en a autât que le Duc de Guyse qui à plaisir se ioue, par maniere de dire, des moyens du Roy & du Royaume de France, secouru de l'argët d'Espaigne, des forces du Prince de Parme, & de tous les Estats Catholique, faict la guerre au Roy de Nauarre : pendant ce temps on a leué, pour cet effect, huit armées par terre, & vne neuuesme par mer. Des neuf, graces à Dieu, les huit s'en sont retournées sans rien faire : la neuuesme a esté defaite entierement en vne bataille. Or il ne se peut dire que ce pauvre Prince ait esté cependant assisté d'vn seul denier, n'y d'vn seul homme, l'argent & les moyens que ses amis lui auoyent enuoyez n'estans pas paruenus iusques à lui : cela n'est ce pas vne preuue certaine, que ces gens ont plus de mine que d'effect? Il y a 30 ans que les Pays bas sont attaquez par le mesme Roy despaigne avec toutes les forces de son pays, d'Italie, & celles qu'il a peu auoir d'Allemagne. Il y a tousiours esté heureux. Tous les combats qui s'y sont donnez, il les a quasi gaignez. Qu'y à il faict? Ils sont encores aujourd'huy en tels termes, que s'ils se peuent vne fois bien entendre, l'autre est à recommencer, & en danger de perdre le labeur, la peine & la despense qu'il a mis en ce pays là. Iugez à cette heure, si le Roy de Dannemarc, les Princes d'Allemagne, les Cantons des Suysses, qui sont demeurez iusques

icy sans qu'on les ait osé attaquer, auoyent porté leurs moyens & leurs forces, pour faire cesser ces violences du Roy d'Espagne en Flâdre & en Angleterre, & de ceux de Guyse en France, combien ils dureroient contre nous en apparence humaine? Je laisse encores plus à conclurre sur cela, que ie n'en dis. Cependant combien que nous ayons plus de forces qu'eux: plus de moyen de nous bien entendre qu'eux, nonobstant cela ils s'entendent mieux que nous, & sont plus forts que nous. Donnons ce reproche à nostre negligence, non à leur industrie: à nostre lascheté, nō à leur courage. Dieu nous a mis entre les mains & de quoy viure en repos & nous deffendre de leur Tyrannie: & de quoy encores les mettre sous le ioug, si nous le voulions faire. Mais pour finir ce propos en theologien, cōmé ie l'ay commencé ainsi, ie croy que c'est le mesme Dieu, le mesme Seigneur, qui ne veut pas que nous tenions de nous mesmes, ni de nostre bras, mais du sien seul, nostre deliurance.

Il me semble que i'ai l'esprit plus allegé à cette heure, quād apres auoit couru toute l'Europe troublee & affligee presque par les diuisions de la religion, ie reuiens à la France, que ie pésois seule touchée de ce mal. Ce n'est point elle seule que Dieu visite: ce n'est point elle seule qui est menacée, les autres parties y ont part, ie retourne donc à elle plus content que ie n'estoye pas, pour conclurre ce discours que i'ay commencé pour elle. En fin ce masque, ce voile qui auoit fillé les yeux du Roy le premier, & à son exemple de tous les François, en fin il est leué. Quand la ligue commença, il y a trois ans, encores se trouuoit il des hommes ou si effroitez ou si hebetez, qui excusoyent cette rebellion,

la

la pallioient d'un zelle de Religion, de la crainte qu'apres un bon Roy Catholique, il n'en succedast un Huguenot. Cela seruit de pretexte aux traistres, qui estoient aupres du Prince lequel ils cognoissoient si desdié & si passionné à sa religion, qu'à ce seul mot on luy fermoit la bouche, on luy ostoit toute replique, tous moyens de iuger ce qu'il devoit faire sur cela. Mais à cette heure ie ne pense pas qu'il y ait homme en tout le Royaume, fut il Iesuite, qui peut excuser l'entreprise du Duc de Guise dans Paris contre son propre Roy. Quelle elle a esté, ie n'en veux autre discours que le sien, celuy mesme qu'il a publié. Or qui me demanderoit là dessus ce qui aduiendra à mon iugement de celà, certes il m'empescheroit bien. J'ay dict ailleurs, qu'il n'y a rien qui soit si dāgereux à un Roy, que la diminution de sa Maiesté: qu'il n'y a rien, qui la diminue tant que s'il fait connoistre qu'il craint quelqu'un en son Royaume: une espece de crainte c'est de souffrir les audaces, & ne les punir point. Toutesfois encor quand ce sont des vulgaires audaces, qui ne touchent que les particuliers, le manteau de douceur & de clemence excuse quelque fois la timidité: mais si c'est au Prince mesme à qui elles s'adressent, si elles violent le saint respect que l'on doit à la sacrée personne du Roy: qui les souffre, n'est plus Roy. Si certe felonnie nullement excusable se pardonne, si le Roy la passe sous silence: il faudra dire, *Sceleris finem putas? gradus est.* Et ne faut point douter que dedans deux ans il ne se face tant d'audacieuses meschancetez que cette-ci sera contée pour une legiere ieunesse. Je suis de la religion reformee graces à Dieu, qui m'a daigné faire tel. moy dis-je qui par l'oubly que



i'auois conceu de les biens faicts m'estois du tout  
 rendu indigne de ce dernier non comparable aux  
 autres: neantmoins si tât est que le Roy pensast que  
 le Roy de Nauarre & nous l'eussions tellemét of-  
 fensé, que nous eussions eu de si lasches & detesta-  
 bles entreprises contre sa vie, cōtre son estat, qu'il  
 ne nous peut en saine conscience pardonner, Ia  
 n'aduienne que sous l'ombre de certe querelle ie  
 luy voulusse conseiller de nous appeler a soy, d'ou-  
 blier nos offences, & de se seruir de nous pour le  
 deliurer de la peyne, où ses gens le reduisent  
 chasque iour. mais non comme François, nō com-  
 me Chrestien, ains seulement comme homme, ie  
 luy ose bien conseiller, quoy conseiller? mais pro-  
 phetizer, que si cest argument de l'ire de Dieu sur  
 luy ne l'esmeut à desirer son bien, & en son bien  
 le repos de son Royaume, le chemin de la paix, la  
 voye de se rendre Roy, d'oster tous les partis de  
 son Royaume, horsmis le sien, & comme il n'y a  
 que lui à qui le sceptre apartienne, ne souffrir point  
 qu'il soit rompu en pieces, & qu'indignemét cha-  
 cun en emporte vn morceau, luy mesmes estant la  
 premiere & plus certaine cause de son malheur,  
 qu'il s'asseure qu'au lieu de l'en deliurer, Dieu le  
 luy augmentera au double. Ie ne veux pas seule-  
 ment parler de ceux de la Ligue, ie parle encores  
 de nous mesmes. Ce que les autres font par mes-  
 chanceté, nous le faisons par necessité: & cepen-  
 dant quant à luy, tout luy est esgal pour sa cou-  
 ronne, elle est aussi bien dissipee & desmembree  
 des vns que des autres, son peuple autāt foulé par  
 nous que par la Ligue. Et n'estoit que nous nous  
 deffendons, & eux ils attaquent: qu'on nous pour-  
 suit, & ils poursuiuēt: que nous nous soubmettons  
 tous-



tousiours à lui, & les autres le veulent assubiectionner  
 à eux, On pourroit dire, que le mal que nous faisons  
 par force à son Royaume, est aussi grand que celui  
 qu'ils y feroient, pour leur plaisir, & pour assouvir leur  
 ambition. A ce mal, hélas! il n'y a qu'un seul remède:  
 qu'il vueille seulement y remédier, il sera Roy pai-  
 sible absolu, obéy, craint, aimé & redouté, pour-  
 ueu qu'il le vueille. Mais comment ferons nous des  
 vœux que Dieu luy en mette le pouuoir dans les  
 mains, si premierement il n'en a le vouloir au cœur?  
 Grand Prince, que ne te crois-tu toy-mesme? tu  
 n'as nul si fidelle conseiller. Ie t'ay ouy autre-  
 fois blasmer la faute du Roy de Portugal, qui ha-  
 sarda son estat sur vne bataille, cōme iugeant sage-  
 ment qu'il n'y a rien si miserable qu'un Prince des-  
 herité. hé! où as-tu mis ta prudence? tu te hasardes  
 à moins cent fois qu'une bataille. qui t'a peu per-  
 suader que ces gens qui n'ont pour desir que ta mort,  
 pour but que ta couronne, mettront bas les armes  
 coniurees contre toy seul, pour te voir aigrir &  
 faire fort le mauuais contre ceux de la religion?  
 Non non, il te la faut laisser, autrement tu n'auras  
 iamais la paix avec eux: & ie croy que si tu la pou-  
 uois quitter sans la vie, tu as des gens assez effron-  
 tez pres de toy, pour le te cōseiller. Ils t'ont chassé  
 hors de Paris, ce que iamais les Anglois, les Es-  
 pagnols, les Allemans ne firent à tes bisayeux: &  
 par tes lettres patentes, tu monstres à ton peuple,  
 qu'au lieu de t'en res sentir, il semble qu'il te tarde  
 desia qu'ils ne t'ont pardonné. Tu commandes que l'on  
 prie Dieu pour cette recōciliation: il n'y a dōc point  
 autrement de dāger de leuer la main cōtre son Roy.  
 Or croy, puis qu'ainsi est, que celui qui a entrepris  
 de te faire fuir aujourdhuy, entreprendra bien de

te faire mourir demain. Et cela, grand Roy, n'est ce pas se hasarder, que de monstrier à ses subiects, qu'il est si facile d'attenter contre toy, quand au lieu de te vouloir venger, tu pries que l'on apaise ceux que tu debuois faire punir? qui t'a peu si malheureusement persuader, que le remede de ton mal, estoit la guerre ciuile? que par ceste voye, tu reconuiriros ton auctorité sur tes subiects? Ah que tu es trompé! il n'y a rien si dangereux en vn bastiment que le feu, en vn corps que la siebure continue, en vn estat que la guerre ciuile. Si tu veux remedier à ces maux, estouffe le feu qui brulle ta maison, amortis la siebure continue du corps de ton estat, donne luy la paix. Car c'est le seul moyé de garder ton Royaume. Tu dis que si tu prononces ce mot de paix avec ceux de la religion, tu auras quant & quât toutes les armes de la Chrestienté Catholique contre toy: qui te despouilleront de ton estat. Ouy, si tu le dis comme celuy qui fuyoit dernièrement de Paris deuant le Duc de Guyse. Prononce le comme celuy qui gaignas les batailles de Iarnac & de Moncontour, & qui tout seul estois plus effroyable, que tout le reste de ton armee: dis-le de ceste façon, & tu trouueras que tout tremblera. Si sur ceste bonne & sainte resolution, tu te veux armer, l'Angleterre, l'Allemagne, la Suyssie courriront d'armes & de cheuaux toutes tes plaines pour ton seruice: Ilst'enuoyront des forces bastantes pour battre & l'Espagne & l'Italie, & ta France, encor si elle y estoit ioincte. Pense premieremét que cela est le bien de ton Royaume, puis il sera ayisé de le faire croire à ton peuple, quâd toy mesme tu le croiras: & si tô peuple le croit, & que tu le vueilles, il estimera ses ennemis & les

& les tiens, ceux qui voudront le cōtraire. Mais tu trains la ligue: qui veux tu dōc qui soit hardi pour toy, de qui prendra on courage que du tien? donne, donne vne paix raisonnable à tes subiects. Commence par les tiens, par les Catholiques. fay les cōtenter de la raison, & n'aye peur que les autres ne s'i reduisent: ils sont trop foibles pour resister cōtre toy en vne mauuaise cause. Elle sera telle, s'ils refusēt vne equitable paix, mais ils ne le ferōt pas, ils ne l'ont iamais faict, le prouerbe est trop ordinaire en ta Cour, Que l'on les contente pour vn presche. Tu as encores crainte: & de qui bō Dieu? du Roy d'Espaigne. Mōstre lui les tableaux de ton Pere, & de ton Ayeul, il trēblera iusques aux fons de Castille. Du Pape, n'as tu pas chez toy des heritiers de Charles de Bourbon? ce sont bayes. Comment se peut il faire, que toy qui as tant veu, qui as tant manié de choses, qui as tant d'experiences, puisses auoir ceste aprehension si engrauee, & à si peu d'occasion? Croy deux maximes: L'une, que tes ennemis ont en toy le meilleur ami qu'ils scauroyēt auoir: L'autre, que sans ceste nuee noire que tu vois autour de la Rochelle, qu'ils craignent cēt fois plus que toy: il y a long temps qu'ils t'eussent enseueli: mais adiousté & croy encor ceste troisieme, que toutes & quantefois que tu voudras à bon esciēt le bien & repos de ton estat, il ne tiendra qu'à toy que tu ne sois le maistre, & que tu ne rendes & les vns & les autres si petis en ce qui cōcernera ton obeissance, & ton rāg, qu'il ne sera pas en leur puissance de tourner vn œuf si tu ne le veux permettre. On te persuade que le plus fort parti, est celuy des Catholiques, & qu'il faut que tu t'assesses profondement en cestuy là, & ten rendes le



chef, pour oster ce titre au Duc de Guyse: On le te  
 persuade, mais on te trompe. Il ne faut pas que les  
 partis te recoiuent, & q̃ tu ailles à eux. Il faut qu'ils  
 viennent à toy, & que tu les reçoies. Estre Roy,  
 c'est ton parti: il ne t'en faut point d'autre: que tous  
 les autres cedent à celuy la. Qu'est ce à dire qu'un  
 Roy de Frâce entre en ialousie d'un Duc de Guy-  
 se? qu'il soit en peyne de luy faire perdre sa crean-  
 ce? Ne connois tu pas que cette ialousie te rend es-  
 gal, & d'esgal incōtinent inferieur? Il y a bien des  
 degrez pour mōter à vne courōne, il n'en a point  
 pour en deualer. C'est vn precipice. Si vn Roy des-  
 cent tant soit peu, il tombe. On te conseille de fai-  
 re bien le choleré cōtre nous: & apres l'auoir bien  
 contrefaict, tu le deuies à bon escient. On te trom-  
 pe encor d'auantage, & n'estoit la passion de ta  
 Religion tu le iugerois bien. Assure toy que ce  
 Duc qui deuient si puissant en ton Royaume, ne  
 retient la meilleure & la plus grande partie de ce  
 qu'il a avec luy, que par ce que c'est à toy mesme  
 qu'il s'adresse. Penses tu que ceux qui le seruent,  
 n'ayēt pour but que la ruine des Huguenots? Nen-  
 ni, nenni, qui a il à gagner contre eux? Si ie m'e-  
 stois abandonné à le suiure, quant à moy, ie pense  
 que ce seroit pour les esperāces qu'il auroit d'e-  
 stre Roy vn iour. Car qu'il soit estimé pour le zele  
 de sa religion Catholique, pour faire mourir for-  
 ce Huguenots, cela est bō pour esmouoir les cro-  
 cheteurs de Paris, & leur faire crier, Au Hugue-  
 not. Ceux qui sont capables de l'aider à remuer vn  
 Royaume, ont d'autres considerations que cela.  
 Or ces considerations ne se font pas perdre par ta  
 contenance, animé contre ceux de la religion, &  
 tréblante contre la Ligue: Cela au contraire c'est  
 leur



leur accroistre & les moyes & les seruiteurs & l'autorité, quand on voit que toy mesme tu montres de les craindre: qui ne les craindra apres? Qui enhardist les hommes que l'impunité Naturellemēt nous aymons la liberté. Iamais il n'i eut de Royau me, qui n'essayast de deuenir s'il pouuoit, estat populaire. Rien ne se doit si precieusement garder par vn Prince que son respect, sa Maiesté & la crainte, laquelle perdue vne fois, ne se peut iamais recouurer, que par les choses qui font craindre, c'est à dire, par la violence & par la cruaute. Grand Roy, tu receuras ce propos, comme il te plaira: Ce n'est point à moy, à limiter tes intétions, Mais si tu le lis avec autāt de passion pour ton bien propre, comme ie l'escriis: tu iugeras que s'il m'eschappe quelque mot de violence, voire mesme contre toy, c'est l'indignation & le creue cœur qui m'i contrainst, voyant le tort & les outrages que l'on te faict: A quoy il semble, par maniere de dire, que tu consentes par ta patience. Ne pense point que i'aye voulu accuser en toy mesme ton courage: Toute l'Europe me desmantiroit: si tu en voulois des tesmoins, il ne faudroit que nous, que tu as si souvent batus, pour en dire. Croy certainement que le desplaisir que i'ay de voir que tu souffres, mal conseillé: les audaces que l'on entreprend seulement sur la confiance que l'on a que tu les souffriras, me letire du cœur & de la plume. Je say que tout ce qui est autour de toy, presque t'a trahy, iusques icy: que ce que tu as faict contre toy-mesme, tu l'as faict en procedant par la voye, par la cōtraire de laquelle les Princes faillēt le plus souvent, par croire conseil. I'y estois present, quand on te disoit que toutes tes villes, tous tes peuples

toutes tes Prouinces estoient desia à Monsieur de Guyse, tous tes hommes à luy. On te le disoit : & n'i auoit que ceux mesmes qui te le disoyent , qui fussent à luy, & ne te le disoyent que pour te vendre & te trahir à lui. Les plus fortes armes de la Ligue contre toy, ont esté en ta Cour, en ton conseil, en ton cabinet. Ainsi il estoit malaisé que tu ne fusses empesché par tant de choses contraires à tes bonnes intentions. Mais puis que Dieu à ce dernier danger ou il t'auoit mis, t'a osté toute excuse & toute occasiō de doubte: que cela au moins te donne enuie de t'aimer toy mesmes plus que tu n'as faict, de vouloir ton bien, ton repos, ta grandeur à bon escient: & quand tu la desireras, tu ne peux que tu ne desires par consequēt celle de ton Royaume.

Je veux finir par toy, flambeau de la guerre, qui as tourné à la ruyne de ton Roy & de ta patrie les grandes graces que Dieu t'auoit donnees pour pouuoir dignement seruir & l'un & l'autre. Penfes tu point que tu seras puny vn iour du parricide que tu commets contré ta propre mere : de tāt de maux, ou dont tu es cause, ou que tu fais toy mesme à celle qui t'a tant faict de biens: tant de maux, dis-je, ausquels tu pouuois remedier, ou par desirer moins, ou par plus sagement desirer, ou pour le moins par borner tes desirs à la fin? Non non: Il ne te faut point d'autre punitiō, que tes propres desseins. Voila ta gesne. Pauvre homme! tu as desia presque quarante ans sur la teste, & tu n'oses encores prendre le nom de Roy : quand en auras tu l'effect? Penfes tu si aisement venir à bout de ceux qui peuuent empeschier la fin de tes vaines esperāces? Il y a trente ans que l'on pert tēps à leur faire  
la

la guerre: Ie t'en donne dix de meilleur marché, il t'en reste vingt. Quel Roy seras tu au bout de cela, à soixante ans? Ont'a ouy mocquer du Cardinal de Bourbon, à qui tu auois persuadé de l'estre à cette aage là: A peine y viendras tu plustost. & si il faut encores que beaucoup de choses te succedēt à souhait. Tu ruineras le Roy de Nauarre (labeur vain de toy & de tes enfans, ie m'en assure.) Sôge toy meisme à te garder de luy: il a les ongles plus grâds que toy: Mais ie le veux, tu le ruineras: quand cela seroit, comment feras tu pour regner? Si apres sa ruine la France est en proye, comme il est malaisé autrement, es tu plus fort que le Roy d'Espaigne? y as tu plus de droit que luy? que le Duc de Sauoye fils d'une fille de France, plus proche que toy, ayât espousé une arriere fille de France? que le fils du Duc de Lorraine ton aîné, fils d'une fille de France aussi, & nepueu du Roy? Si au contraire l'estat se maintient en son entier, commēt osteras tu par une voye legitime le droit aux Princes du sang Catholiques, qui resteront, & qui sont en assez grâd nombre, & assez ieunes pour ne mourir point deuant toi, si tu ne les fais mourir? Qui plus est, au parauant tout cela, qui te peut persuader que le Roy qui regne ne t'epeschera point de regner? tu ne saurois tant qu'il viura: Il faut que tes premiers coups commencent sur luy (& cela fais tu bien) il faut que tu l'ostes de deuant toy: car il te nuit dix mille fois plus que le Roy de Nauarre, & si tu n'as ce premier dessein, tu n'as du tout point de iugement en ton dessein. Car tu ne peux luy viuât estre Roy, non pas mesmes durer gueres, tenant le chemin que tu tiens: Mais tu ne veux pas regner. Et quoy donc miserable? Si ce n'est cela, qui te



meine? si ce n'est vne grâde & puissante ambition, qui t'anime, telle que l'auoyent autrefois ou Marius, ou Sylla, ou Cæsar, on te detestera bien aux siecles aduenir d'auoir tât faict de mal au monde pour neant. L'ambitiõ est la peste de la société humaine: elle a tousiours accompagné neantmoins ceux qu'elle possedoit, du lustre de tant de belles & grandes actions, que l'on blasme les ambitieux mais on les admire. Si tu as l'ame assez genereuse: pour conceuoir les esperances d'un Royaume, il se trouuera quelcun à l'aduenir qui dira, que tu estois digne de n'estre Roy, puis que tu as osé entreprendre de l'estre. On ne t'imputera, peut estre, point les malheurs & les calamitez dont il te faut necessairement estre cause pour y paruenir: mais on dira que de ceste façon le destin à voulu signaler ta venue, que tu deuois estre trop grand pour sortir par vne porte ordinaire, & qu'il te falloit des ruines pour te receuoir, & pour te faire place: Nec aliam venturo fata Neroni inuenere viâ. Aussi tu seras condamné, mais beaucoup de ceux qui te condamneront desireront de te ressembler: ou au contraire, si, laschemēt meschāt, tu n'as au mal que tu fais autre but que d'empescher le bien & le repõs de tout le mōde, que dirõt de toi nos nepueux, qui est-ce d'être eux qui ne t'appellera point le fleau de ce siecle cy? Mais puis que tu ne peux estre Roy, tu n'as pas enuie de l'estre: il te suffit seulement de brouiller & diuiser nostre estat, afin au moins que tu en retiennes la meilleure partie. Encor plus miserable. Dieu net'auoit il pas assez donné de vertu pour y meriter vne part honorable, par les mains de ceux à qui iustement le tout apartiendroit? qui eussent esté tousiours bien aises de t'a-



de t'auoir pres deux pour parent, comme tu l'és, & pour bon & vtile seruiteur comme tu le pouuois estre. N'aymois tu pas mieux estre tenu à ton Roy de ton bien, en seruant à ta patrie, qu'à vn Prince estranger en la ruinant? Regarde ce que tu fais: ton Pere & ton grand pere ont faict en Italie la part au Roy d'Espaigne, & tu la luy veux faire en France: Sic ne patriflas? Ce n'est point encor tout cela. Quoy donc le seul zeile de la religion Catholique t'eschaufe le cœur? Le croy que tu le dis en public non pas en ton cabinet. encores ay-je peur, que si tu ne changes bien tost de langage, tu ne te repentes d'auoir chassé ton Roy de Paris. Il n'est pas heretique, Non. mais il est Roy. Quicōque le fera ou d'effect ou d'esperance, t'est ennemy. A la fin tu feras conoistre que c'est encores pour cela mesme que tu en veux au Roy de Nauarre, & que tu es plus ialoux de son esperance que de sa consciēce. Je le croy. & s'il te vouloit permettre d'estre Roy, tu lui permettrois aisement d'estre Huguenot. C'est le zeile de la Religion, bon Dieu? Quoy? pour l'augmenter. Il y a encores tāt de Turcs & de Sarrafins au monde, qui te detiennēt le Royaume de Ierusalem, hereditaire à ta maison: que neournes tu plustost là tes desseins que sur celui de France? Mais c'est pour la deffendre: he qui l'ataque? qui ose rien demander aux Catholiques? Je suis donc d'aduis, que tu nous persuades, que les Loups se doiuent donner garde que les brebis ne les surprennent: que les Lions se deffient des Cerfs. Ce que tu dis est cela mesme. Pour vn homme de la Religion en France, il y a cent Catholiques. Si le Roy de Nauarre pendāt la vie du Roy prenoit la voye de les persecuter, il seroit mal

traicté: si apres, il seroit mal receu. Non: n'allegue point ces excuses: on s'en mocque, Dy seulement que tu veux regner, que tu veux estre Roy: voila la plus vraye & la plus belle couleur de ton enseigné.

Je concluray à la fin, & ne te repliquerai que ces deux ou trois mots sur les lettres que tu as fait courir. Tu publies premierement, que c'estoit toy seul qui aduanceois le voyage de Guyenne, (Id est contre le Roy de Nauarre) auquel tu auois tant d'affection. Mais qu'est il besoin que tu sollicites autrui? que n'y vas-tu toi-mesme? Cherche là ou vne victoire, ou vne mort honorable côme le Duc de Ioyeuse. Fais ceste offre au Roy d'y aller en person: il te prédra au mot: menes y tous tes amis, toutes tes forces, il les augmétera encor' des siennes. Porte là le feu de la guerre, puis que c'est là où tu trouueras tes ennemis, & tu les y trouueras sàs doubte. Pourquoi l'allumes tu en Picardie? y a il aussi des heretiques là? Que pleust à Dieu que Galais & Boulongne fussent aussi bien à la deuotion du Roy de Nauarre comme tu les en accuses: On te garderoit bien d'aller faire le mutin à Paris: tu aurois tout loisir de te renfermer à Chaalons, sàs penser qu'a te deffendre. Voyci que c'est. Tu voudrois que le Roy te laissast la tutelle de Frâce entre tes mains, & que lui s'en allast en Guyenne faire la guerre pour ta querelle, ruiner le Roy de Nauarre ton ennemi, establir tes affaires, afin que ce pendant qu'il s'amuseroit là a battre vne bicoque, tu lui prisses deçà vne bonne ville, & à la charge encor qu'à son retour il te feroit place, toutes & quâtes fois qu'il te plairoit. Tu as raison: c'est tres-bien aduisé & sagement: mais il est encores plus sage

sage que toi de ne le vouloir pas faire. Tu dis que le Duc d'Esperron fauorise les heretiques: tous ceux qui t'empeschent d'estre Roy, sont heretiques à ton conte, ou les fauorisent. Ils s'en trouuera donc bien au monde s'il plaist à Dieu. Tien pour chose certaine, que si cestui là eust voulu auoir la moindre intelligence avec le Roy de Nauarre, s'il lui eust mis entre ses mains la moindre ville de celles qu'il auoit en sa puissance, ou l'aider tant soit peu des commoditez d'argét qu'il pouuoit auoir, il n'i eust point eu assez de place en France pour te cacher, Tu serois desia perdu, ie dis perdu sans remede: Ren lui graces de ta conseruation, dont sa fidelité est cause aux despés de la sienne & de celle de son maistre. Il est allé chercher noyse, ce dis tu, en Picardie & en Normandie. Quelle part as tu en ces deux Prouinces là? De l'une, feu Monsieur le Prince en estoit gouuerneur: en son absence, il y auoit des Lieutenans de Roy, de l'autre le Duc de Joyeuse, tout de mesmes, ni toi, ni nul de tes parens n'y auez droict. Mais non, ie t'excuse, tu veux regner, tout t'est loisible. Tu te plains encor que l'on auoit fait courir de mauuais bruits contre toy & contre ton honneur, lesquels, graces à Dieu, tu as effacez par ce dernier acte. Tu es vn merueilleux Rhetoricien, certes il est vray, tu t'en es bien purgé. On t'accusoit d'auoir mutiné le peuple de quelques villes de ce Royaume contre les Gouverneurs que le Roy vouloit y establir. Tu as effacé ce bruit en mutinât celui de Paris contre le Roy mesme. On te blasmoit d'auoir à Chaalons, à Reims, à Soissons, & par tout ou tu mets le pied, saisi ses derniers. Tu t'es purgé en prenât ceux de son espargne dâs sa ville Capitalle. On te soupçõ-



noit d'auoir des entreprises cōtre l'estat, & d'aspirer à la Couronne: & pour cet effect de t'estre desia emparé de quelques bōnes villes tenues par toy ou par tes partisans, ausquelles le Roy n'est point obeï. Tu as faict euanouir ce faux bruiet, en venāt toy mesme te rēdre le maistre de Paris, & en chassant le Roy, apres auoir forcé, tué & desarmé les gardes, & faict prēdre les armes à la populace cōtre lui. Ainsi tu essayes brauemēt vn larcin par vn sacrilege, vn meurtre par vn parricide, vn peché par vn crime. Ta suptilité est trop grossiere. Tu triōphes de ce que tu as osé venir avec huit gētils hōmes dans Paris, marque de ta simple innocence. Voila de grandes nouuelles, sois dans la Rochelle avec toute ta nouuelle cour, toute ta suite, toutes tes gardes: Le Roy de Nauarre y entrera avec quatre, & si au partir de là, tu ne t'en fuis, il te mettra en peyne: cela est bon à dire en la basse Bretagne: mais ceux qui connoissent que tout le conseil du Roy est pour toy, que sa mere te fauorise, que tous les mutins & tous les crocheteurs de Paris, & toute la populace est à ta deuotion, diront que ta simplicité estoit bien fine, tō innocēce bien suspecte. Comment veux tu que nous croyons que tu t'es si doucement fié au Roy, veu qu'apres la ligue, quād vous fistes vostre belle capitulation, à Saint Mor, tu n'i voulus iamais venir, que tu ne fusses aussi fort que lui, veu que durāt qu'il a esté en son armée cōtre les Reistres, tu n'as pas mis le pied, hormis vne fois l'ayāt surpris & seulemēt vn quart d'heure? Non, croy moy: c'est ton mestier de faire ces coups là, nō de les excuser: tu sçais mieux l'un que l'autre. Il y paroist bien, puis que tu te vātes qu'il a esté en ta puissance de retenir tō Roy maugré luy.

Ah!



Ah! qu'as tu dit là Estrâger? retenir vn Roy de France? c'est tout ce que pourroit faire l'Europe cōiurée, c'est l'entreprise d'un Empereur encores bien hasardeuse. Si ton ayeul eust pensé que iamais tu eusses deu proferer telles parolles, il eust estouffé ton pere pour t'empescher de venir au monde. En vn estat paisible, en vn Royaume tranquille, ceste seule parole t'eust cousté la teste. Voyla pourquoi tu le troubles aussi.

De tout le reste de ta Lettre publique les mots en sont trop expres, trop bien couchés pour estre contredits. En faisant le Discours de ta belle vail-lantise, ils monstrent ton dessein mieux que nul ne sçauroit faire: ie n'en veux prendre que la fin, par laquelle tu dis, q tu t'es saisi de la Bastille, de l'Ar-senal, & des autres lieux publics, des coffres & finances du Roy, pour remettre le tout entre les mains de sa Maiesté pacifique, tel que par l'inter-cession du Pape & des Princes de la Chrestienté tu esperes de la rendre: sinõ, avec les mesmes moy-ens, tu essayeras de desgaiger les Catholiques de la persecution de ceux qui fauorisent les hereti-ques aupres de luy. Voyla vn braue dilemme. Je crois que tu entens Pacifique, non pas paisible ou appaisé, mais en tel estat qu'il ne te puisse faire guerre, quel tu esperes le rendre par les forces & les moyès d'Espagne & d'Italie: c'est l'intercession que tu veux dire: & finalement, petit & simple sub-iect, tu denonces la guerre à ton Roy. Les autres la souffrent, cestuy cy la commence. Si le feu Empe-reur en eust autant dit au Roy Henri son Pere, toute la Chrestienté eust esté en armes d'un costé ou d'autre sur ceste porolle. si Dieu luy touche le cœeur aussi, j'espere que ce sera ta derniere.

F I N.

# DECLARATION DE LA VOLONTE DV ROY, FAICTE depuis son departemēt de Paris.

**N**OSTRE amé & feal, nous estiōs en nostre ville de Paris, où ne pēsions à autre chose qu'à faire cesser toutes sortes de ialousies & empeschemēs du costē de Picardie & ailleurs, qui retardoyent nostre acheminement en nostre pays de Poitou, pour y poursuiure la guerre commcēe contre les Huguenots, suiuant nostre deliberatiō: Quand nostre cousin le Duc de Guyse y arriua à nostre desceu, le neufiesme de ce moys. Sa venue en ceste sorte augmenta tellement lesdites desfiances, que nous nous en trouuāsmes en bien grande peine, parce que nous auions au parauant estez aduertis d'infinis endroits qu'il y deuoit arriuer de ceste facon, & qu'il y estoit attendu d'aucuns des habitās de ladite ville qui estoient soupsonnez d'estre cause des desfiances, & lui auions à ceste occasion fait dire au parauant que nous ne desirions pas qu'il y vint, que nous n'eussions composē les troubles de Picardie, & leuē les occasions desdites desfiances. Toutesfois considerans qu'il estoit venu seullemēt accōpagné de quatorze ou quinze cheuāux, nous ne voulusmes pas laisser de le voir, pour essayer à faire avec luy que les causes desdites desfiances & troubles de Picardie fussent ostees. à quoy voyāns que nous n'auācions guerres & que d'ailleurs nostre dite ville se remplissoit tous les iours des gentils hommes & autres personnes estrangeres, qui se rallioyent à la suite dudit Duc, que les recherches que nous auions cōmandē estre faittes par la ville par les Magistrats & officiers d'icelle, ne se fai-

faisoient qu'à demi, pour la crainte en laquelle ils  
 estoient, & aussi que les cœurs & volonte de au-  
 cuns desdits habitans s'aigrissoient & alteroient  
 tous les iours de plus en plus, avec les auertisse-  
 mens ordinaires qui nous redoubloyent iournelle-  
 ment qu'il deuoit esclorre quelque grand trouble  
 en ladite ville: Nous prîmes resolution de faire fai-  
 re lefdites recherches plus exactemēt par les quar-  
 tiers d'icelle q̄ les precedētes, afin de descouvrir &  
 recognoistre au vrai l'estat de la ville, & faire vui-  
 der lefdits estrangers qui ne seroient aduouez cō-  
 me ils deuoyent estre. Pour ce faire nous aduisas-  
 mes de renforcer certains corps de garde des ha-  
 bitans & bourgeois de laditte ville, que nous auions  
 ordonnez estre dressez en quatre ou cinq endroits  
 d'icelle, des compagnies des Suisses, & de celles  
 du regiment de nostre garde, qui estoient logees  
 aux fauxbours d'icelle, & de commander aussi à  
 aucuns Seigneurs de nostre conseil, & cheualiers  
 de nostre ordre du S. Esprit, d'aller par les quar-  
 tiers avec les quarteniers & autres officiers de la-  
 dite ville, par lesquels l'on a accoustumé de faire  
 lefdites recherches pour les authoriser & assister  
 en icelles, comme il s'est fait plusieurs fois, dont  
 nous fîmes aduertir ledit Duc, & tous ceux de la-  
 dite ville, afin que personne n'en prit l'alarme & ne  
 fust en doute de nostre intention, en cest endroit.  
 Ce que du commencement les habitans & bour-  
 gois de ladite ville feirent contenāce de receuoir  
 doucement. Toutesfois quelque temps apres, les  
 choses s'eschauserent de telle façon par l'inductiō  
 d'aucuns qui alloient semans & imprimans au  
 cœur desdits habitans que nous auions fait entrer  
 lefdites forces pour establir des garnisons estran-  
 geres en ladite ville, & leur faire encore pis, qu'ils



les eurent bien tost tellemēt animez & irritez cōtre  
 icelles, que si nous n'eussions expressement deffen  
 du à ceux qui leur cōmandoyent de n'attenter au-  
 cunes choses cōtre lesdits habitās, & d'endurer &  
 souffrir plustost toutes les extremitez du môde, q̄  
 de ce faire: Nous croyōs certainemēt qu'il eust esté  
 impossible d'empescher vn sac general de ladite  
 ville, avec vne tresgrande effusion de sang. Quoy  
 voyant, nous nous resolumes de ne farie executer  
 plus auāt lesdictes recherches cōmencees, & de fai-  
 re retirer quāt & quāt lesdites forces, que nous n'a-  
 uions fait entrer pour ceste seule occasiō: estāt vray  
 semblable, q̄ si nous eussions eu autre volōté, nous  
 l'eussions tentee & peut estre executee selō nostre  
 desir, deuāt ladite esmotion. & qu'ils eussent tendu  
 les chaines, & dreslé les baricades par les rues, cō-  
 me ils cōmencerent à faire incontīnēt apres midy,  
 quasi en mesme tēps par toutes lesdites rues de la-  
 dite ville à ce instruis & excitez par aucuns gētil-  
 hommes, Capitaines ou autres estrāgers, enuoyez  
 par ledit Duc de Guse, qui se trouuerēt en biē peu  
 de tēps departis & rangez par chascune des dizai-  
 nes pour cet effect faislāt retirer lesdites cōpagnies  
 Suysses & Françoises. Il y eut à nostre tresgrād re-  
 gret quelques harquebusades tirees & coups ruez  
 par lesdits habitās, qui porterēt principalemēt sur  
 lesdits Suysses, que nous fismes retirer & loger ce  
 soir là és enuirōs de nostre chasteau du Louure, afin  
 de voir ce que deuīedroit l'esmotiō en laquelle es-  
 toient lesdits habitās, & fismes tout ce qu'il nous  
 fust possible pour l'amortir iusques à faire le lēde-  
 main du tout sortir & retirer de ladite ville lesdites  
 cōpagnies, reserué celles que nous auīōs deuāt leur  
 entree, posees en garde deuant nostre dit chasteau  
 du Louure, nous ayāt esté remōstré, que cela cōten-  
 teroit



teroit & pacifieroit grandement lesdits habitans.  
 Nous fîmes aussi arrester quelque restes de com-  
 pagnies de gens de pied du regiment de Picardie,  
 qui estoÿt encor touteſois à sept ou huiſt lieues  
 de ladite ville, ensemble quelques Seigneurs &  
 gentilshômes nos ſeruiteurs, qui nous venoyent  
 trouuer, voyant que l'on en auoit donné ombrage  
 à ce peuple, & que l'on ſe ſeruoit de ceſte couleur  
 pour eſmouuoir d'auantage lesdits habitans: neant-  
 moins au lieu d'en voir l'effect tel que nous atten-  
 dions pour leur propre bié & noſtre contentemēt,  
 ils auroyent continué depuis à hauſſer d'auantage  
 leſdites baricades, renforcer leurs gardes iour &  
 nuit, & les aproucher de noſtre dit chasteau du Lou-  
 ure, iuſques cōtre les ſetinelles de noſtre garde or-  
 dinaire, & meſmes ſe ſeroyēt faiſies de l'hoſtel de  
 ladite ville, ensemble des clefs de la porte S. An-  
 thoine, & autres portes d'icelle: de ſorte que les  
 choſes ſeroyēt paſſees ſi auāt le 13. de ce mois, qu'il  
 ſembloit qu'il n'eſtoit plus au pouuoir de perſonne  
 d'empêcher l'effect d'vne plus grande violence &  
 eſmotion iuſques deuāt noſtre dit chasteau. Quoy  
 voyant & ne voulant employer noſdites forces  
 contre leſdits habitans, pour nous auoir touſiours  
 eſté la conſeruatiō de ladite ville & des bōs bour-  
 geois & habitāſ d'icelle auſſi chere & recomman-  
 dee, que celle de noſtre propre vie, ainſi qu'ils ont  
 eſprouuē en toutes occasions, & eſt treſnotoire à  
 vn chacun: Nous nous reſolumes d'en partir ledit  
 iour, & pluſtoſt nous abſenter & eſloigner de la  
 choſe du monde, que nous aimons autant com-  
 me nous deſirons faire encore, que de la voir cou-  
 rir plus grand hazard & en receuoir auſſi plus de  
 deſplaiſir, ſupplier la Royne noſtre treſhonoree  
 dame & mere, d'y demeurer, pour voir ſi par

sa prudēce & autorité elle pourra faire en nostre absence pour assoupir ledit tumulte, ce qu'elle n'a peu faire en nostre presēce quelque peine qu'elle y ait employé. Et nous en sommes venus en ceste ville de Chartres, d'où nous auōs bié voulu incōtinnēt vous faire la presēte pour vous prier de mettre en consideratiō le consequēce de ce fait, cōbien il apportera de preiudice & de defauātage à la chose publique, & principalemēt à nostre Saincte religiō Catholique, Apostolique, & Romaine, s'il passe plus auant, puisque ceux qui auoyent accoustumé de cōbatre tous ensemble pour la propagatiō d'icelle, serōt par cet accidēt (s'il n'est réparé) desunis & contrains de tourner leurs armes les vns contre les autres. A quoy nous vous prions de croire que nous ferons de nostre costé tout ce qu'il nous sera possible, pour n'i tōber, tāt a de puissance sur nous le zele que nous portons à nostre dite religiō: que nous auōs assez fait paroistre iusques à present. Et vous prions & exhortons tant qu'il nous est possible, de faire prier Dieu en vos Eglises de ceste reuñion, & que l'obeissance qui nous est deue nous soit conseruee cōme il appartient, & ne permettre que les habitās de nostre ville, & c. se desuoyēt du droit chemin: mais les admonester & cōfirmer à demeurer fermes & constans en leurs loyauté enuers leur Roy, en vñō & concorde tous ensemble pour se maintenir & cōseruer sous nostre obeissance, & ne tōber aux incōueniens qui leur sont preparez s'ils tiennēt autre chemin. Et outre que vous ferez chose digne de vostre prudence, fidelité & deuoir qui seruira de grād exemple à tous nos suiets, nous vous en sçaurōs grē & le reconnoistrōs à iamais enuers vous & les vostres. Donné à Chartres le            iour de May 1588.

## COPIE DE LA LETTRE

ESCRITE AV ROY, PAR MON-  
seigneur le Duc de Guyse, le 17.  
de May dernier.

SIRE, Je suis si malheureux, que ceux qui de  
Slong temps par beaucoup d'artifices, ont tasché  
de m'ellongner de vostre presence, & de vos bon-  
nes graces, ont eu assez de pouuoir pour rédre inu-  
tiles tous les bons desseins que j'ai faict de m'en  
approcher, & par mes seruices me rendre agrea-  
ble à vostre maiesté. Ce que j'ay ces iours passez  
plus esprouué que iamais, à mon tresgrand regret.  
Car estant lassé de tât de faux bruits & calomnies,  
dôt on vsoit pour entretenir vostre Maiesté en def-  
fiance de moy, j'ay voulu avec le hazard, dont on  
me menaçoit, iustifier ma vie, ayant prins resolu-  
tion de la venir trouuer en si petite compagnie, &  
avec tant de confiance & franchise, que j'esperois  
par ce moyen faire voir à chacun que l'estois fort  
eslongné de ce dont mes malueuillans taschoyét  
avec tant d'artifice, de me rendre suspect. Mais les  
ennemis du repos public, & les miens, ne pouuans  
souffrir ma presence aupres de vous, estimans que  
dans peu de iours, elle descouriroit les impostu-  
res, dont l'on vsoit pour me rendre odieux, & peu  
à peu me donneroit place en vos bonnes graces,  
ont mieux aymé par leurs conseils pernicieux re-  
mettre toutes choses en confusion, & vostre Estat,  
& vostre ville de Paris en hazard, que d'endurer  
que ie fusse aupres de vous. Leur mauuaise vo-  
lonté s'est manifestement reconnue, en la resolu-  
tion que sans le sceu de la Royne vostre mere,  
& contre l'aduis de vos plus sages Conseillers,



ils ont fait prendre à vostre Maieſté, de mettre par vne voye inuſitee, & en vn temps plein de ſoupçon & partialitez, des forces dans vostre ville de Paris, pour occuper les places publiques d'icelle. Et la voix commune publie, qu'ils eſperoyent, apres s'eſtre rédus Maiſtres, pouuoir encor vous induire à beaucoup de choſes, toutes alienes de vostre bõ naturel, & que i'ayme mieux paſſer ſoubs ſilence. L'eſfroy de cela, SIRE, a cõtraint vos bõs & fidelles ſubiects de s'armer, pour la iuſte crainte qu'ils ont, en ce que par ceſte voye, on ne vouluſt exccuter ce dont on les menaçoit long tẽps au parauãt. Dieu par ſa ſaincte grace à contenu les choſes en meilleurs termes, qu'on ne les pouuoit eſperer, & a cõme miraculeuſemẽt cõſeruẽ votre Ville d'un treſperilleux haſard. Et le cõmancement, la ſuite, & l'euenement de ceſt affaire a tellement iuſtifĩe mes intentions, que i'eſtime que vostre Maieſté, & tout le monde connoiſt aſſez clairemẽt par là, cõbien mes deportemẽs ſont eſlongnez des deſſeins dont mes calumniateurs m'ont voulu rendre coupable. La forme de laquelle ie me ſuis volontairement iettẽ en vostre puissance, monſtre la confiãce que i'ai prins de votre bontẽ & la ſinceritẽ de ma conſcience. L'eſtat auquel on me trouua lors que i'eu les premiers aduis de cette entrepriſe, & de quoy vous peuuẽt teſmoigner pluſieurs de vos ſeruiteurs, fait aſſez connoiſtre que ie n'auois doubte d'eſtre offencẽ, ni volontẽ d'entreprendre, eſtant plus ſeul & deſarmẽ, en ma maiſon, que ne peut & doit eſtre vn de ma qualitẽ. Le reſpect dont i'ay vſẽ, me contenant dans les ſimples bornes d'une iuſte deſſence, vous tẽmoignent aſſez que nulle occaſiõ ne me peut faire deſchoir du deũoir d'un  
treſ-



tres humble subiect. La peine que i'ay prise pour  
 contenir le peuple, & empescher qu'il ne vint aux  
 effects, qu'amenent le plus souuant tels accidens,  
 me descharge des calomnies, qu'on m'a cideuant  
 imposees: Que ie soulois troubler vostre ville de  
 Paris. Le souci que i'ai prins de conseruer ceux  
 mesmes, que ie n'ignorois point de m'auoir faict  
 de mauuais offices enuers vous à la suscitation de  
 mes ennemis, faict voir à chascun clairement, que  
 ie n'ai iamais eu intention d'attenter aucune cho-  
 se contre vos seruiteurs & officiers, cōme l'on m'a  
 faulxement accusé. La façon dont ie me suis com-  
 porté enuers vos Suysses, & enuers vos capitaines  
 & soldats de vos gardes, assure assez que ie n'ay  
 iamais tant crainct que de vous desplaire. Si vostre  
 Maiesté a sceu toutes ces particularitez, cōme i'e-  
 stime que plusieurs de vos bons seruiteurs aymans  
 le repos public, qui en sont tesmoins, ne les luy au-  
 rōt pas celes, ie tiés pour assuré qu'elle demeure  
 par la esclarcie, Que ie n'ai iamais eu la moindre  
 des mauuaises intensions, dont mes ennemis par  
 faux bruits m'ont voulu rendre odieux. Et i'espere  
 SIRE, que la fin en dônera encores plus assuré tes-  
 moignage, ayant receu vn des plus grands desplai-  
 sirs qui me pouuoit aduenir, quand i'entendis que  
 vostre Maiesté auoit pris resolution de s'en aller:  
 D'autant que le subit partement m'osta le moyen  
 de pouuoir, cōme i'auois enuie, accommoder toutes  
 choses à vostre cōtētemēt: Et à cela ie les voyois  
 disposees, lors q̃ la Royne vostre mere me fist cet  
 honneur de venir ceās, Dequoy ie lui ay donné tels  
 tesmoignages q̃ i'estime qu'elle les peut tenir cer-  
 tains. Puis que ie ne peus lors, SIRE, Ie continue-  
 ray cette mesme volonté, & espere me comporter

en forte, que vostre Maieſté me ingera tresfidele  
 ſubieſt & ſeruiteur, qui ne deſire rien tant, qu'en  
 bié faiſant & pourchaffant le bien de vostre Roy-  
 aume, acquerir l'heur de ſes bonnes graces, les-  
 quelles ie ne ceſſeray iamais de rechercher iuſques  
 à ce que Dieu m'en ait preſenté le moyen: Le-  
 quel ie prie, SIRE, donner à vostre Ma-  
 ieſté, &c. De Paris le 17.

May 1588.

# EXTRAICT

EXTRAICT D'AVTRES LET-  
TRES ESCRITES PAR LEDIT SEI-  
gneur Duc de Guyse.

**N**ous auions assez de peine à remparer con-  
tre les artifices, que l'on nous dresloit tous  
les iours pour chercher couleur de ne passer en  
Guyenne contre les heretiques: nous allions ren-  
dre le Roy content de ses garnisons de Picardie.  
Et bien que ce regiment n'eust prins le cōtrepiéd,  
que pour raffraichir de vieilles innimitiez, & cher-  
cher nouuelles contritions, si est-ce que nous a-  
uons forcé nos amis à endurer vn inutile mois, les  
forces d'Espernon sur leurs testes. Quand de nou-  
veau pour plus grand empeschement, le mesme  
Espernon est allé chercher noise en Normandie, &  
l'i eust trouué bien rude, si pour le desir de voir  
faire la guerre aux heretiques, nous n'eussions en-  
cores mesnagé ces affaires, & procuré que nos a-  
mis se continssent, sans luy donner aucun trouble  
ou empeschement. Mais pour plus nous embaras-  
ser, & par toutes ces garnisons superflues, & ces  
voies perdus: & pour rompre du tout le cours  
de la guerre, & la diuertir contre nous, l'on nous  
dresta vne partle à l'honneur, faisant courir des  
bruits, pour nous faire craindre plus que les mes-  
mes heretiques: Sur ce que nous aimions vn mas-  
sacre dans Paris: Tâtoist de vouloir prédre le Roy:  
Tâtoist de saccager la ville, pour en tirer de largét,  
& faire la guerre à qui bon nous sembleroit. Et  
telles autres impressions que l'on donnoit à sa Ma-  
iesté les plus coulourees que faire se pouuoit, pour  
les rendre tant plus receuables. Ce a esté le der-  
nier artifice, qui nous a plus apporté de desespoir,

voyant que le Roy taschoit plus de pouruoir à ses  
 desiances, qu'à continuer la guerre contre les he-  
 retiques, & que nous estions si malheureux d'estre  
 tenus de quelques vns en tel estime: iusques là que  
 sa sainteté mesmes en ait prins subiect de nous  
 porter par vn sic Bref à la fidelité enuers le Roy no-  
 stre Souuerain. Ce desespoir dis-ie de derniere im-  
 pressio, me tenoit fort faisi, lors que i'entendis que  
 tout ouuertemēt sa Maiesté renforçoit ses gardés,  
 iusques à quatre enseignes Françoises, & trois de  
 Suysses. De sorte que pour ne demeurer vne seule  
 heure soupçoné d'actes si vilains, ie me rédis douze  
 heures apres dās Paris, accōpaigné de huit gētils  
 hommes, & au milieu de toutes les gardes mentiō-  
 nees ci dessus, ie vins baiser les mains à sa Maiesté,  
 ne portant autre sauscōduit que mes seruices, en la  
 cōfiance que doit auoir vn bō subiect en son Roy.  
 Cette franchise, sincerité & cœur ouuert, me deb-  
 uoit apporter, ce me semble, vne claire iustificatiō  
 de tous les faux bruits passez. Et à la verité il n'i eut  
 homme de bien, qui n'en sentist ioye en son cœur,  
 cōme chacun l'apperceut assez euidemmēt. Le len-  
 demain tousiours assure en ma conscience, ie fus  
 tout le iour aupres du Roy, en fermēt tantost dās les  
 Tuilleries, traictant du voyage de Guyenne & de  
 cette guerre que i'affectionnois tant. Pendant ces  
 iours, cōme il est à presumer, le Roy s'informa de  
 tous costez si i'estois poursuiuy de pl' grāde troupe,  
 que celle qu'on auoit veu à mon arriuee. Et ap-  
 pres auoir connu, cōme la verité estoit que i'estois  
 ainsi seul, & sans vn seul homme de guerre, à qua-  
 rante lieues de moy, Voyci le lendemain matin  
 douziesme May, entrerent aussi tost que le iour,  
 douze Enseignes de Suysses, & huit Enseignes de  
 gens



gens de pied François, outre les quatre de la garde, par la porte Saint Honnoré: le Roy estant & tous ceux de sa cour à cheual pour les recevoir. Le maître du Camp du regiment des gardes, & les Colonels de Suysses ont commandé de s'aller saisir de toutes les places de Paris: Et pour n'estre empêchez, les habitans d'un bout de la ville furent despartis tout à l'opposite de leurs quartiers, afin de les tenir en volonté de se rôpre d'eux mesmes, pour le souci & l'eslongnement de leurs femmes & enfans, en tel accident. Durant que cela se dispoisoit, ainsi que ie dormois en mon logis, si peu accompagné que mon train n'estoit pas encores arriué de Soissons: cōme Dieu voulut, au tēps qu'on separoit des forces en tant de lieux, i'eus loisir d'en estre auerti, quelques Gentilhommes de mes amis, estās à Paris pour leurs affaires, me vindrēt trouver. Et sur tout, Dieu excita miraculeusement tout le peuple à courir unanimement aux armes. Et sans cōferer ensemble, assemblez de ma presence, & de quelque ordre que ie mis soudain parmi eux, d'eux mesmes s'allerēt accommoder, & barricader de tous costez, à dix pas desdites forces estrangères, & d'une si grande propititude & vehemence, qu'en moins de deux heures, ils firent entendre ausdites troupes, qu'elles eussent à se retirer à l'instant hors de la ville & faubourgs. Et sur ce, en mesme temps, un Suysses en quelque quartier blaiſſa un habitant, les habitans chargerent les Suysses, qui se trouuerent là, en tuerent 12. ou 15. & en blefferent 20. ou 25. & desfermerent les autres. D'autre costé quelque compagnie des gardes du Roy fut aussi desarmée & renuerſee dans les maisons, où ils furent contrains avec leurs Capitaines de s'enfermer. Cela

fut cause que ie marchai par la ville, & d'abordee deliuray neuf cens Suysses prisonniers, & plusieurs soldats des gardes, que ie fis reconduire seurement iusques au Louure. Ceste iournee, toute reluisante de l'infaillible protection de Dieu, estât acheuee, i'allay par toutes les rues, iusques à deux heures apres minuit, priant, suppliant, menaçant le peuple, si bien que par la grace de Dieu il ne s'en ensuiuit aucun meurtre, massacre, pillerie, ni perte d'un denier, ni d'une goutte de sang, outre & par-dessus ce que vous auez entendu, encores que le peuple fust extremement enuainimé, pour auoir secu (disoyent ils) qu'il y auoit eu vingt potences prestes, avec quelques eschaffaux, & auoir veu les executeurs de iustice pour faire mourir cent ou six vingt personnes qu'ils nommoient, & que i'aime mieux vous laisser deuiner, qu'escire. Je ne vous puis celer combien de contentement m'apporta cette grace immense de Dieu. Premièrement pour voir si clairement mon honneur desgagé de ces soubçons de sac & massacre qu'on auoit essayé de persuader à tant de gens de bien. Car pour auoir peu tout cela, & l'auoir si heureusement empesché, ie rendois muets tous mes ennemis. Secondement auoir donné preuue de mon zele au seruice & à l'honneur de mon Roy, iusques à faire rendre les mesmes armes qu'on auoit portees contre moy, & leurs feus, & leurs tambours, reconduire les prisonniers, renuoyer les drappeaux, desgaiger les assiegez, & ne perdre le respect, où les plus constants eussent peu perdre. Ils firent tant qu'ils persuaderent le Roy de s'en aller, vingt quatre heures apres que i'eusse peu mille fois si i'eusse voulu l'arrestter : mais ia à Dieu ne plaise, que i'y aye iamais songé

songé depuis son partement. Sa Maïesté a quelque  
 autre conseil & aigreur. J'ay receu l'Arsenal, la Ba-  
 stille & les lieux forts entre mes mains. J'ay faict  
 sceller les coffres de ses Finances : pour configner  
 le tout entre les mains de sa Maïesté pacifique, tel  
 que nous l'esperons rendre par nos prieres enuers  
 Dieu, par l'intercession de sa Saincteté, & de tous  
 les Princes Chrestiens, & pour ceste signalee & nô  
 commune preuue de fidelité, qu'il lui à pleu met-  
 tre entre mes mains. Ou si le mal cõtinue, i'espere  
 par les mesmes moyens conseruer ensemble, & la  
 Religion & les Catholiques, & les desgager  
 de la persecution que leur preparoyent  
 les confederez des hereti-  
 ques aupres du Roy.

F I N.

AMY LECTEUR, ESTANT TOM-

BE ES MAINS DE L'IMPRIMEUR VNE  
troisième Lettre du Duc de Guyse au sieur  
de Bassompierre, il s'est aduisé de l'ad-  
iouster à ce Discours, afin que tu  
puisses en faire ton profit.

Autre Lettre Dudit Duc de Guyse au S.  
de Bassompierre.

**I**ESCRIS à son Altesse vne lettre que ie vous prie  
de voir: bien que le Bailly de S. Michel, tefmoin o-  
culaire, iustificiera toutes mes actiōs: la presence du-  
quel, iusques à ceste heure, m'a empesché d'e ren-  
dre plus souuēt cōpte: m'assurāt qu'il n'i oubliera  
riē. Les termes ausquels nous sommes sont, que ce  
matin nous presentons nōstre requeste, qui est di-  
rectemēt à la ruine d'Espenō, où toutes ses perfe-  
ctiōs sont qualifiees cōme elles doyēt, sans en riē  
oublier. Hier ie fus à la maison de ville, pour y ad-  
mettre la Chapelle, qui a esté esleu Preuost des  
marchans, & le General Rolland Cōpan, & autres  
gēs de biē & catholiques pour Escheuins, le Pre-  
uost des marchans Perreuze estant à la Bastille, &  
les traistres Escheuins en fuite. L'ō n'a iamais veu  
vne si grāde obeissance de peuple en telle esmotiō:  
car il ne se peut dire qu'il y soit aduenue aucun de-  
sordre ni mesfait, iusques aux espees, morions, pic-  
ques, harquebuses, de douze cens Suysses, ou Fran-  
çois prins, que ie fis rendre. Il ne s'est trouué chose  
du mōde perdu. Nous auons esté indignement as-  
saillis & par trespernitieux conseil trop recouert  
d'heretique. Dieu par sa grace nous à conserué par  
la resolutiō obeissāce & hardiesse de ceux de Paris,  
qu'ils continuēt plus que iamais en leur ferme re-  
solution & brauerie de prester tout debuoir &



obeissance au Roy: mais deffous de conferuer leur zele à la religion, & la seurté de leur ville. Le Roy fait des forces & nous aussi: Il est à Chartres, & nous à Paris. Voyla cōme vōt les affaires. Le Gouverneur du Haure c'est brauement maintenu contre Espernon, & n'en a voulu ouir parler: Celuy de Caen ne l'a voulu receuoir le plus fort dans son chasteau. Voyla ce qu'il a fait en Normandie, dōt il est sorti sans aucun establissement pour luy ni les siens, estāt venu trouuer le Roy hier, bien qu'il luy eust mandé par quatre despeshes n'i venir, pour estre en horreur à tous les Princes & officiers. Ceux d'Orleans, d'Amiés, d'Abbeuille, Bourges, & plusieurs grandes villes, ont chassé les Politiques dehors, & prins plusieurs prisonniers. Toutes les petites villes enuoyent icy recognoistre la ville & nous. La Iustice vit doucemēt, & personne ne peut dire mal de tous ces effects. Or faut il que faciez vn tour icy pour voir vos amis, que vous ne trouuerez Dieu merci despourueus de moyen ni resolution. Il faut bien estre aduerti d'Allemaigne, affin de n'estre preuenu. Il ne nous manque forces, courage, amis ni moyens: mais encores moins d'honneur, du respect & fidelité au Roy auquel inuiolablemēt nous le garderons, vfans de tous deuboirs de gens de bien, d'honneur, tresbons Catholiques. Voyla les termes où sont vos amis qui se recommandent à vos bonnes graces. Ce vingt & vniesme may.


L'amy de cœur.


Monsieur le Conte trouuera ses tresaffectionnees recommandations. Son Altesse verra ce mot.

L'Amy de cœur.

Venez viste.









E588  
H959c

